

# NDINGA YA KIDIMBU



Beno bikala ya kutelema na mwa ntangu fioti na Ntwala ya Mfumu. Beto tanga Ndinga ya Yandi, na Exode, kapu 4.

*...Moise vutulaka mvutu mpe tubaka, Kasi, tala, bawu ke kwikila na munu ve, mpe bawu ke wa ndinga ya munu ve: kasi bawu ke tuba, MFUMU me monika na nge ve.*

*Mpe MFUMU tubaka na yandi, Yinki yina na diboko ya nge? . . .yandi tubaka ti, nkawa.*

*Mpe yandi tubaka, Losa yawu na ntoto. Mpe yandi losaka yawu na ntoto, mpe yawu kumaka nioka; mpe Moise vwandaka tina na ntwala na yawu.*

*Mpe MFUMU tubaka na Moise, Tanda diboko ya nge, mpe simba yawu na mukila. Mpe yandi tandaka diboko ya yandi, mpe kangaka yawu, mpe yawu kumaka nkawa na diboko ya yandi:*

*Na yina bawu lenda kwikila ti MFUMU Nzambi ya batata ya bawu, Nzambi ya Abraham, Nzambi ya Isaac, mpe Nzambi ya Jacob, me monika na nge.*

*Mpe MFUMU tubaka diaka na yandi, Tula ntangu yayi diboko ya nge na ntulu. Mpe yandi tulaka diboko ya yandi na ntulu ya yandi: mpe na ntangu yandi basisaka yawu, tala, yawu vwandaka ya kifuluka na wazi mutindu mvula-mpembe.*

*Mpe yandi tubaka, Kotisa diaka diboko ya nge na ntulu. Mpe yandi kotisaka diaka diboko ya yandi na ntulu ya yandi; mpe basisaka yawu na ntulu ya yandi, mpe, tala, yawu kumaka diaka mutindu nzutu ya yandi.*

*Mpe yawu ke salama ti, kana bawu kwikila na nge ve, kana bawu kwikila ve na ndinga ya kidimbu ya ntete, bawu ke kwikila na ndinga ya kidimbu ya nsuka.*

*Mpe yawu ke salama ti, kana bawu kwikila na nge ve, bidimbi yayi zole, ata mpe na ndinga ya nge, nge ke baka masa ya nzadi, mpe tiamuna yawu na zulu ya ntoto ya kuyuma: mpe masa yina nge bakaka na nzadi ke kuma menga na zulu ya . . .ntoto ya kuyuma.*

<sup>2</sup> Beto kulumusa bayintu ya beto samu na bisambu. Ntangu yayi kana beno ke na lombilu mosi, na nkokila yayi, yina beno zola zabisa na Mfumu, beno telemisa maboko ya beno na zulu mpe tuba, “Mfumu, bambuka munu ntangu yayi. Mu ke na nsatu mosi.”

<sup>3</sup> Tata ya beto ya Mazulu, beto ke kwisa diaka na Nge na nkokila yayi, na kuzabaka ti beto me kulumusa bayintu ya beto na ntoto sika wapi beto me katuka, mpe, kana Nge kwisa nswalu ve, beto ke vutuka na putulu. Kasi na kivuvu ya lusakumunu ya nsilulu kati na Klisto, ti Klisto ke nata kintwadi na Yandi bayina nionso kele na Nzambi. Beto—beto ke pesa na Nge matondo samu na nsilulu yayi ya nkembo. Mpe mu ke sambila, Nzambi, ti Nge ke bambuka mosi na mosi ya beto yina me telemisa maboko ya bawu na zulu, ya munu mpe, Mfumu.

<sup>4</sup> Mu ke sambila, na nkokila yayi, na ngunga yayi ya nsuka ya lukwikilu, ti Nge pesa na bantu na nkokila yayi lukwikilu, ti Mfumu Yesu ke vwanda ya kieleka samu na mosi na mosi ya beto, ti ke vwanda diaka ve na muntu ya kulemba na kati ya beto na manima ya nkokila yayi. Bika ti konso nsumuki kuzaba ti yandi ke na Ntwala ya Mfumu Yesu, mpe na yawu yandi ke lomba lemvo ya masumu ya yandi, mpe yandi pesa ntima ya yandi na Nge, mpe yandi fuluka na Mpeve, na bangunga yayi ya nsuka ya yimbi, beto ke mona yawu mutindu kivudi mosi ya nene ke fika ntoto.

<sup>5</sup> Beto ke sambila, Nzambi, samu na lutwadusu ya Kinzambi, na nkokila yayi, samu na muntu yina ke tuba mpe muntu yina ke wa. Bika ti Mpeve-Santu kubaka lukutakanu ntangu yayi mpe kubuka Dimpa ya Luzingu samu na mosi na mosi ya beto na mutindu beto ke na nsatu, samu beto ke lomba yawu na Nkumbu ya Yandi. Amen.

Beno lunga vwanda.

<sup>6</sup> Mu ke na kivuvu na nkokila yayi ti beto ke vwanda na kiyeka ya kumonisa na bantu yina beto zola ti bantu kumona, mfunu ya kukwikila na Nzambi.

<sup>7</sup> Ntangu yayi, mbasi na manima ya midi na ngunga kumi na yiya na bamuniti makumi tatu, beto ke sambila samu na bayina nionso kele na bakalati ya bisambu. Mpe samu na kuzaba ti beto me zimbana muntu mosi ve, ti konso muntu me baka kalati ya bisambu, konso nkokila beto ke pesa bakalati ya bisambu. Mpe yandi ke kabula yawu diaka mbasi, na . . . Mu banza, na ngunga kumi na tatu na bamuniti makumi tatu to kima mosi ya mutindu yina, kaka na ntwala ya lukutakanu. Mpe bayina nionso zola ti beto sambila samu na bawu, to bampangi ya beno ya zola, bika bawu kwisa baka kalati ya bisambu. Ya kieleka bawu ke baka—ke baka kalati ya bisambu. Mpe beto ke . . .

<sup>8</sup> Beto zola sambila samu na bantu, kutetika maboko na zulu ya bawu mpe kusambila samu na bawu. Ntangu yayi kana lukwikilu ya beno lunga telema ve na Ntwala ya Mfumu Yesu mpe kundima Yandi mutindu Munganga ya beno, mpe beno kwikila kaka ti kana beto sambila mpe tetika maboko na zulu ya beno, ti yina lenda sadisa beno, mbote, ya kieleka beto kele awa samu na kusala konso kima yina beno me zola.

9 Kikuma mu me vutula yawu, mu me pusa yawu na ntwala, ti konso muntu yina zola, lunga kuma na Nzambi na nzila ya yina. Mpe beto ke na bantu mingi ve. Kele na . . . Yinzo ke ya nene ve, mpe beto ke na bantu mingi ve. Beto lunga baka kilumbu ya mbasi na manima ya midi mpe beto sambila samu na bayayi nionso kele awa, manima ya midi me kubama samu na yawu, kusambila samu na bambevo.

10 Mpe beto kele awa samu na kusala nionso yina beto lunga sala samu na kusadisa beno na kuvwanda na mwa luzingu ya mbote, kulembisa kizitu ya beno, na nzietelo yayi beto ke sala.

11 Na yawu na konso ntangu yina, yina muntu mosi zola ti—ti yandi kwisa na Mfumu Yesu, kukondwa kutala konso kisalu yina, beno kwisa kaka. Beno vingila ve tii kuna lubokilu ya autel ke salama. Beno vingila ve tii kuna bawu bokila beno. Beno kwisa kaka, samu na kundima Klisto, mpe kwisa kaka mpe ndima Yandi kaka. Samu kikuma ya beto ya ntete awa, kele kumona bamoyo ya beto kubutuka na Kimfumu ya Nzambi.

12 Mpe ntangu yayi, mbasi ke vwanda Lumingu, mpe ke vwanda na lukolo ya Lumingu, na bayinzo-Nzambi. Kikuma beto ke vwanda na balukutakanu ya beto na manima ya midi, na Lumingu, samu beto zola ve ti balukutakanu ya bawu kukangama. Beto ke kwikila ti konso Muklisto lenda vwanda na yinzo-Nzambi mosi yina bawu ke kwendaka. Konso Muklisto lendaka kutana na bakwikidi sika mosi kuna. Mpe konso kisika yina beno ke kutanaka, yawu yina yinzo-Nzambi.

13 Ntangu yayi, kana mu vwandaka zinga awa, mu zolaka vwanda mosi ya mabuundu yayi awa, yina ba pasteur yayi awa, bayina ke na ngwisani, ke talisa. Samu na yinki? Samu bawu me vwanda awa na kisika ya malongi, samu na kumonana na bantu nionso, samu na kutalisa ti bawu ke ndima yina ke salama awa. Bawu ke kwikila na ministere ya mutindu yayi, kubeluka ya Kinzambi, mbotika ya Mpeve-Santu, mpe nionso yina. Bawu kele awa samu na kupesa kimbangi na yawu. Kele bawu yina bokilaka munu na kukwisa awa, ti mbala yankaka ministere yayi Mfumu pesaka munu lunga sadisa mabuundu ya bawu.

14 Tala ntangu yayi pasteur ya kieleka, yina ke sosa na kuzwa mambote nionso ya kimpeve yina yandi lunga, nionso yina Nzambi ke sala, ti yandi ke meka na kusala nionso samu na kusadisa dibuundu ya yandi na kukwenda na ntwala samu na Nzambi. Ya kieleka mu ke katula yimpu ya munu samu na kuzitisa pasteur ya mutindu yina.

15 Mpe bantu yayi salaka yawu na kati ya mpasi, diaka. Beno ke kwikila ti yina ke kieleka. Bawu salaka yawu na kati ya mpasi. Mpe ya kieleka mu—mu ke vutula matondo na bantu yayi ya nene ya Nzambi, bayina zola baka bisika ya bawu mpe kuvwanda na bisika ya bawu ya kisalu ya kundima ya bawu, mpe—mpe bawu ke kwikila. Nzambi sakumuna bawu kukonda nsuka!

<sup>16</sup> Mu ke ndima ti bawu ke sala beno mbote. Ntangu yayi, kana beno ke nzenza awa, beno sosa sika wapi kele bayinzo-Nzambi ya bampangi yayi, sika wapi yawu kele. Beno kwenda tala bawu mbasi. Bawu ke vwanda na balukutakanu ya nene, mpe kele na balongi awa yina ke longi na bayinzo-Nzambi ya luswaswanu, mpe mutindu yawu zabisamaka na ntwala. Na yawu beno vwanda na bawu mbasi.

<sup>17</sup> Mpe na yawu mbasi na manima ya midi, kana beno lenda kwisa na kisalu ya nsuka, ya kieleka beto ke vwanda na kiese na kuvwanda na beno. Mabuundu nionso, ba denomination nionso, yawu ke samu na muntu nionso. Kukwisa ya mbote na muntu nionso: Methodiste, Baptiste, Presbyterien, Pentecotiste, dibuundu ya Klisto, dibuundu ya Nzambi, Catholique, Juif Orthodoxe, muntu ke kwikilaka na Nzambi ve, nionso yina beno kele. Beto kele. . . Beno me bokilama.

“Beno ke tuba, ‘Muntu ke kwikilaka na Nzambi ve?’”  
Yinga, tata.

<sup>18</sup> Kana muntu ke kwikilaka ve na Nzambi kukwisa na lukutakanu mpe kuvwanda mpe yandi sala mambu ya mbote, beto ke zodila yandi kukwisa ya mbote mutindu muntu yankaka nionso. Ya kieleka. Kima mosi, yina beto zola ti yandi vwanda awa, ti kima mosi kusalama yina lunga sadisa yandi na kumona kifu ya yandi, mpe yandi kwisa na Mfumu. Samu beto. . . Ya kieleka.

<sup>19</sup> Bantu yikwa me tangaka ntete mwa vision yina zulunalu ya Bantu ya Mumbongo ya Baklisto basisaka na mukanda, mpe mu ke kwikila diaka na mwa bazulunalu-. . . , ya, *Kutala Na Simu Yina Yankaka Ya Ntangu?* Ntangu yayi yina ke kieleka, nkundi ya munu. Beno luta na lweka na yawu ve. Mu—mu me kumaka muntu ya luswaswanu kubanda kilumbu yina. Mu zaba ti yawu ke kieleka, na yawu mu—mu—mu ke kaka na kivuvu ti mosi ve na kati na beto lunga kondwa Zulu yina ya nkembo yina Nzambi ke na yawu samu na bakwikidi. Kana mutindu yina ve, yinki beno me sala awa na zulu ya ntoto? Samu, beno zaba ve yinki ntangu beno ke katuka na yinza yayi. Kasi beno zaba kima mosi, beno ke ndima ti beno ke bika yawu. Na yawu kana yina ke kieleka, mpamba ve ti beto ke vwanda bazoba na kumeka na—na ku. . . Beto meka ve na kusala kifu yina. Beno me mona, beno bambuka kaka ti, beno kwikila Ndinga ya Nzambi mpe konso nsilulu ke na kati ya Yawu.

<sup>20</sup> Beno banza kaka ti, yinki pesaka muswa na konso kimbevo, konso mpasi ya ntima, konso lufwa, konso muvusu, konso souci, kikata ya mwana yayi, bima yayi nionso, bikata, kifwa-meso, kutungama ya konso yinzo ya bambevo? Samu muntu mosi zimbana na kukwikila mwa kitini ya Ndinga. Yawu vwandaka Eve. Satana vunaka yandi kaka. Yandi tangilaka yandi yawu ve,

kasi vunaka yandi, yandi tubaka, “Ya kieleka . . . Mfumu kele ya mbote mingi.”

<sup>21</sup> Beno ke waka mambu yina mingi bubu yayi ti, Nzambi kele Nzambi ya mbote. Yandi ke Nzambi ya mbote, kasi beno bambuka ti Yandi ke Nzambi ya busantu, Nzambi yina lunga tala mpamba ve disumu. Ndola futamaka samu na yawu, mpe beno ndima yawu kaka na mutindu na Yandi. Mpe beno bambuka moyo ti, Yandi ke Nzambi ya nganzi, Nzambi ya nkele. Mpe beno ke samba na ntwala ya Nzambi ya nganzi, kaka ve mutindu Nzambi ya mambote mpe ya mawa. Na nkokila yayi Yandi ke Mvulusi ya beno; Kilumbu yina Yandi ke vwanda Zuzi ya beno.

<sup>22</sup> Na yawu beno ndima mbote-mbote ti beno me zimbana kima mosi ve, nkundi ya munu. Yawu—yawu ke vwanda ve . . . Yawu ke futa ve. Beno baka yawu ve—yawu ve na zulu-zulu. Beno ndima, beno ndima mbote-mbote, samu beno ke kuzwa siansi yankaka ve. Yayi ke siansi ya beno mosi kaka, na ntangu beto kele awa na zulu ya ntoto. Beno bambuka bakala yina ya mvwama na Lazare.

<sup>23</sup> Kele na dibulu mosi ya nene kati-kati ya beno na Yandi, yina muntu mosi me zabukaka ntete ve, to ke zabuka ata fioti ve. Beno me mona? Na ntangu beno—na ntangu beno ke fwa, yawu ke manisa diambu. Mu zaba ti kele na bantu yina ke banza ti bawu lunga basisa beno na bisika yina na nzila bisambu, kasi beno kwikila mambu ya mutindu yina ve. Yawu ke telemina Ndinga ya Nzambi. Beno me mona? “Yinti ke bwaka, na lweka yina yawu me kondamana.” Mpe Yesu tubaka, Yandi mosi, ti, “Kuvwandaka na dibulu mosi ya nene, ti, na ntangu muntu mosi me fwa mpe me kwenda na difelo, yandi lunga kwisa ve (ata fioti ve) na Zulu. Muntu mosi ve me zabukaka yawu, mpe lenda zabuka yawu ata fioti ve.” Yina ke manisa diambu, na mutindu ya munu. Na ntangu Yesu tubaka ti yawu vwandaka mutindu yina, yawu manisaka diambu.

<sup>24</sup> Na yawu beno bambuka ti, yayi ke siansi ya beno, mpe yawu lunga vwanda ntangu ya mbote samu na beno na nkokila yayi.

<sup>25</sup> Beno lunga bakala ve yina ke salama? Kana beno lunga mona yawu! Mu ke na kivuvu ti beno ke banza ve ti mu ke tuba mutindu yina, samu na kumeka kubenda mabanza ya beno na kutala na muntu mosi, to samu na kukwikila na muntu mosi. Mu ke sala mutindu yina ve, nkundi ya munu. Mu ke meka na kusala ti beno kwikila ti beto ke na Ntwala ya Yandi na ntangu yayi. Yesu Klisto, Nzambi ya kieleka yina ke sambisa beno na Kilumbu yina, kele awa na kukitalisaka Yandi mosi na ntwala ya beno, kima ya kieleka yina Yandi silaka ti Yandi lenda sala na bilumbu yayi ya nsuka.

<sup>26</sup> Mu banza ti na madia ya suka, Mpangi Price pesaka mbandu mosi samu na kotalisa na ntangu beno me kuma na kisika mosi ya nsongi, sika wapi beno lenda baluka. Beno ke sepela na yawu?

[Dibuundu me tuba, “Amen.”—Mu.] Ya kieleka. Ya kieleka yawu vwandaka na sika na yawu, ya kieleka.

<sup>27</sup> Ntangu yayi, na yawu beno bambuka moyo, na bambala mingi na ntangu beto me kuma na nsongi, kasi beto ke kwenda na lweka yankaka. Mu longaka yawu, na ntangu mosi, mpe mu bokilaka yawu, *Kati-kati ya Banzila*. Na bambala mingi, na ntangu beto me kuma na kati-kati ya banzila, beto ke kwenda na lweka *yayi* mpe na banzila ya luswaswanu.

<sup>28</sup> Na nkokila yayi ntangu yayi, samu na mwa bamuniti ke kwisa, mu zola baka yintu ya dilongi ya—ya: *Ndinga Ya Kidimbu*. Mpe ntangu yayi disolo na beto ke zibuka, na nkokila yayi, na Buku ya Exode, mpe *exode* zola tuba “kubasika; yina ba me basisa.” Ntangu yayi beno meka na kuwa mbote-mbote.

<sup>29</sup> Mu ke zolaka kukwisa longa na beno, beno ke nkonga mosi ya bantu ya kitoko, kasi mu ke na ndinga ya mbote ve. Ya ke lomba ti mu sala mwa kingolo-ngolo samu na yawu, mpe mu zaba ti yawu ke vwanza mutindu yina. Mu zola pema fioti ntangu yayi, samu na bilumbu nana to kumi, na ntwala mu banda lukutakanu yina ke kwisa. Beno me mona, yawu ke kaka ve lukutakanu yayi awa. Yawu ke lukutakanu, kilumbu na manima kilumbu, sabala na manima ya sabala, ngonda na manima ya ngonda, mvula na manima ya mvula, beno me mona, mpe beno lunga banza yawu.

<sup>30</sup> Mpe beno banza na bambala nionso, mvula na manima ya mvula, kele ata mbala mosi ve Yandi me tubaka ntete ve kima mosi yina vwandaka ve kieleka ya kulutula mbote, na muvimba na yawu; na bandinga nionso, na yinza ya muvimba, bambala sambwadi. Beno me mona? Ata muntu mosi ve, kisika mosi ve, yina lunga manga yawu kasi nionso salamaka na mutindu ya kulutula mbote, na muvimba na yawu, konso ntangu. Na ntangu Yandi ke tuba ti kima mosi ke salama, yawu ke salama kaka mutindu yina. Yawu zabisamaka na ntwala kubanda basabala mpe bangonda, mpe bamvula, ata ti, na ntwala yawu salama, mpe yawu ke vwandaka kaka ya kieleka ntangu nionso. Yawu me bwaka ata fioti ve, mpe ke bwa ata fioti ve, samu yawu kele Nzambi. Ntangu yayi, mutindu muntu, mu lunga kubwa. Beno baka munu ve mutindu mbandu mosi, samu mu—mu ke kaka mutindu mosi na beno, nsumuki yina me vuluka na lemvo. Kasi yina ke Nzambi, ya mazulu, beno me mona, Yandi mosi ke kukitalisa. Yandi lenda sala yina ve, kasi Yandi silaka ti Yandi lenda sala yawu.

<sup>31</sup> Yesu vwandaka belusa bantu samu na kulungisa Ndinga. Yandi salaka mambu yina samu ti Ndinga ya Nzambi kulungisama.

<sup>32</sup> Kikuma yawu yina Yandi ke sala yawu bubu yayi, ti Ndinga ke lungisama, yina mu ke tangaka samu na beno, nkokila na manima ya nkokila.

<sup>33</sup> Beno bambuka ti beto ke na Ntwala ya Yandi, Yawu, ya kieleka, Yawu ke zangula ntima. Mutindu mu tubaka na suka yayi, “Konso kima yina ke zangula ntima ve kele ya kufwa.” Konso bisambu yina ke zangula ntima ve, beno zika yawu, yawu ke ya kufwa. Yawu ke zangula ntima. Yawu ke pesa beto diaka luzingu. Kasi na ntangu beto me baka diaka luzingu, beto bambuka Yina pesaka beto diaka luzingu. Yinki salaka yawu? Yawu ke Ntwala ya Mpeve-Santu, Yesu Klisto na kati ya beto, ke kukitalisa Yandi mosi ti Yandi ke zinga. Nzutu ve; na ntangu ke kwisa, nzutu yina ke katuka na Zulu, ntangu ke vwanda diaka ve. Ya ke vwanda nsuka. Mpe beto zaba ti beto ke zinga na ntangu yango, ti beto ke zinga na bilumbu ya nsuka, na ntangu mambu yayi ke salama.

Ntangu yayi, Nzambi vwandaka na exode na ntangu me luta. Kele na . . .

<sup>34</sup> Na Nzambi, bima nionso ke tambulaka na tatu. Nzambi ke ya kulunga na tatu. Kwizulu ya ntete ya Klisto, samu na *kuvulusa* Kento ya Yandi; kwizulu ya zole ya Klisto, samu na *kuyamba* Kento ya Yandi; kwizulu ya tatu ya Klisto, na Kento ya Yandi, samu na kuyala na Millenium. Bima nionso ke tambulaka na tatu.

<sup>35</sup> Ntangu yayi, yawu vwandaka, yawu ke vwanda, na ba exode tatu. Mosi ya yawu, Nzambi kotisaka bawu *na kati* ya nzaza, samu na exode mosi, ya zangulaka bawu na zulu ya ntoto. Na ntangu yankaka, Nzambi basisaka bawu *na nganda* ya—ya Egypte. Mpe na ntangu ke kwisa, Nzambi ke zangula bawu *na zulu*. Na kati, na nganda, na zulu! Exode yankaka ke salama. Beto ke kutana na mosi ntangu yayi, ntangu ya kuzanguka na zulu.

<sup>36</sup> Mutindu mosi na luzingu. Beto ke *kota* na luzingu, beto ke *basika* na luzingu, beto ke *vumbuka* na luzingu, kima ya mutindu mosi kaka. Na yawu beto ke . . .

<sup>37</sup> Disolo na beto ke zibuka na nkokila yayi na exode, Nzambi me kubama samu na kubaka yinsi ya Yandi.

<sup>38</sup> Israel kele yinsi mosi. Nzambi ke salaka na Israel mutindu muntu mosi ve. Israel kele yinsi mosi, ya ke salaka na bawu kaka mutindu yina. Mpe na bilumbu ya nsuka, na manima ya kukwenda ya Dibuundu, na yawu Nzambi ke vulusa Israel mutindu yinsi mosi. Ba ke na yinsi ya bawu na ntangu yayi, bawu me kubama samu na yawu. Mpe bawu ke vuluka, Biblia tubaka ti, “Yinsi mosi ke butuka na kilumbu mosi.” Nzambi ke salaka na ba Juif mutindu muntu mosi ve. Yandi ke salaka na bawu mutindu yinsi mosi, Israel, ntangu nionso, samu yawu ke yinsi ya Yandi.

<sup>39</sup> Mpe awa Yandi me kubama na kubasisa yinsi ya Yandi na yinsi mosi, na exode mosi, kutinisa bantu ya Yandi ntama ya lusambusu.

40 Masa yina mosi kaka kuzindisaka yinza, yawu yina vulusaka Noé. Beno me mona? Mpe Mpeve-Santu mosi kaka, yina bantu ke manga bubu yayi, ke yamba Dibuundu mpe ke zangula Yawu na zulu, mpe ke nata lusambusu na bayina kwikilaka na Yawu ve.

41 Yesu tubaka ti, na ntangu bawu bokilaka Yandi, “Béelzébul,” na nzonzolo yankaka, Yandi vwandaka “nganga-nkisi,” bawu. . . Yandi tubaka, “Mu ke pesa beno lemvo samu na yawu,” (Mwana ya muntu, munkayulu vwandaka me salama ntete ve.) “kasi na ntangu Mpeve-Santu ke kwisa sala diambu mosi yina, ndinga mosi yina ke telemina Yawu beno ke baka lemvo ata fioti ve na yinza yayi to na yinza ke kwisa.”

42 Yawu ke lomba ti bawu manga yawu, mpe na manima lusambusu ke kwisa. Beno me mona, mpasi kele ti beto. . .

43 Yina ke bambula munu moyo na disolo mosi mu tangaka kilumbu mosi, samu na munati musuwa mosi ya nkulu yina katukaka na nzadi, na ntangu muyimbi mosi ya Kingelesi ya ntwenia vwandaka kwenda na nzadi. Mpe muyimbi sonikaka mambu mingi na yina me tadila nzadi, kasi yandi me monaka yawu ntete ve, mpe yandi vwandaka kwenda kuna. Mpe munati masuwa ya nkulu tubaka na yandi, na kinzu ya yandi na yinwa, yandi tubaka, “Wapi nge ke kwenda, nkundi ya munu?”

44 Yandi tubaka, “Mu ke kwenda kuna na nzadi.” Yandi tubaka, “Mu me monaka yawu ntete ve. Mu me sonikaka samu na yawu, mpe bayankaka tubaka samu na yawu, kasi,” yandi tubaka, “oh, mu ke na kiese mingi na kuzaba ti mu ke pene-pene ya nzadi.” Yandi tubaka, “Oh, samu na kuwa nsudi na yawu ya mungwa! Samu na kutala munene ya yawu, bitembo ya yawu ya mpembe, mpe zulu ya bule ke kukitalisa yawu mosi, mpe kuwa bandeke ya nzadi ke pamuka na zulu, oh, mu ke na kiese na dibanza ya kumona yawu!”

45 Munati masuwa ya nkulu tubaka, “Mu me butukaka pene-pene na yawu, bamvula makumi sambanu me luta, mu ke monaka kima ya kitoko ve na yawu.” Beno me mona, yandi me monaka mambu mingi samu na yawu tii kuna yandi yikanaka na yawu.

46 Ntangu yayi diambu yawu yina na dibuundu ya Pentecote bubu yayi. Bawu me monaka mambu mingi ya Nzambi, tii kuna bawu me yikana na Nzambi. Beno pesa muswa ve ti yawu vwanda mutindu yina!

47 Awa ntama mingi ve, na Louisville, na Kentucky. Kisika mu me katuka, na Jeffersonville, Indiana, yawu ke na lweka yina ya nzadi. Mama mosi vwandaka tambula na mwa magazini ya ntalu ya fioti. Mpe yandi vwandaka. . . vwandaka me simba na diboko ya yandi mwana mosi ya bakala, yina vwandaka na kidi-kidi mpe yandi vwandaka tala bima vwanda kuna na kati ya magazini. Yandi bakaka kima mosi, talisaka yawu na mwana-bakala yina; yandi vwandaka pima mpe vwandaka



ntangu nionso na kidiba. Yandi kwendaka na kima yankaka, mpe bakaka kima yankaka mpe talisaka yawu na mwana-bakala yina; yandi vwandaka ntangu nionso na kidiba. Mpe na manima ya mwa ntangu fioti, yandi bakaka mwa ngunga mosi mpe bandaka na kuningisa yawu, mpe mwana-bakala yina vwandaka ntangu nionso na kidiba. Mpe yandi bandaka na kuboka, mpe telemisaka maboko ya yandi na zulu. Mpe bantu na kati ya magazini ke tala yandi, na yawu bantu kwendaka pene-pene ya yandi samu na kuzaba yina vwandaka tambula mbote ve.

<sup>48</sup> Yandi tubaka, “Mu ke. . . Na mwana ya munu ya bakala,” yandi tubaka, “yandi ke kaka na bamvula tatu.” Mpe yandi tubaka, “Munu. . . Mvula mosi me luta, na mbala mosi, yandi me kuma na kidiba.” Mpe yandi tubaka, “Mu—mu nataka yandi na munganga,” mpe yandi tubaka, “mpe munganga sonikaka mwa bankisi mpe nionso yina.” Mpe yandi tubaka, “Mpe munganga tubaka na munu, bubu yayi, ti yandi banza ti yandi vwandaka mbote. Kasi,” yandi tubaka, “yandi ke mbote ve.” Yandi tubaka, “Mu me ningisa bima nionso na ntwala ya yandi, samu na kubenda bukebi ya mwana-bakala ya bamvula ya yandi, bukebi ya yandi. Konso kima yina lungaka benda bukebi ya mwana-bakala ya bamvula ya yandi, mu me ningisa yawu na ntwala ya yandi, mpe yandi vwandaka kaka na kidiba.” Yandi tubaka, “Yandi ke mbote ve.”

<sup>49</sup> Yina ke mutindu mosi na dibuundu ya Pentecote. Nzambi me ningisa konso dikabu, yina ke na kati ya Biblia, na ntwala ya bawu, mpe bawu ke bikala kaka na kidiba, ya ke monana ti kima mosi ke tambula mbote ve. Yayi ke ntangu samu beto vumbuka, bankundi ya munu, na ntwala ntangu kuluta. Beno bambuka ti, Nzambi ke ningisaka makabu yina ve na mpamba kasi samu Yandi benda bukebi na beno.

Nzambi kele na kubasisa yinsi na yinsi mosi.

<sup>50</sup> Yandi ke sala kaka mutindu mosi na ntangu yayi, ke basisa Kento mosi na dibuundu, ke bika na lweka mbuma yankaka ya kento. Yina Soolamaka ke basika na dibuundu mosi. Dibuundu ya kimuntu ke bikala awa na kati ya bampasi. Yina *soolamaka* ba ke bokila yandi na bantangu yankaka “yina ponamaka, soolamaka, mpe ya fioti.”

<sup>51</sup> Beto tala yinki mutindu Yandi salaka yawu, samu Yandi ke sobaka ata fioti ve nzila ya Yandi ya kusala mambu. Nzambi ke na nzila mosi kaka ya kusala mambu, mpe yina ke mutindu Yandi ke salaka yawu, ntangu nionso, mpe yina ke nzila mosi ya mbote. Beno tala yinki mutindu Yandi salaka yawu, mpe mutindu Yandi salaka yawu, mpe na yawu beto lunga baka dibanza na diambu yayi.

<sup>52</sup> Ntangu yayi, ya kieleka, mu ke typologue. Mu me longukaka ve. Mu lenda vutuka kaka na manima mpe kutala yina Yandi salaka. Mpe beto me longamaka ti, “Ngwisani ya Ntama

vwandaka kivudi ya bima yina ke kwisa.” Na yawu kana mu me monaka ntete ve diboko ya munu, mpe mu tala awa mpe mu mona kivudi ya diboko na munu, mpe yina ke na misapi tanu, mu ke bakula mbote-mbote ti na ntangu mu ke mona diboko ya munu kuna, mu ke vwanda na misapi tanu. Na yawu yina salamaka na bawu vwandaka bambandu yinki mutindu Nzambi ke sala mambu, mutindu Yandi ke sala yawu ntangu yayi.

<sup>53</sup> Mpe mutindu Yandi ke sala yawu, Yandi ke soba yawu ata fioti ve. Konso ntangu, na kati ya Biblia, Yandi me sobaka ntete ve mutindu ya Yandi ya kusala mambu. Yawu ke mutindu mosi ntangu nionso, samu nzila ya Yandi ya ntete ya kusala mambu kele nzila ya kulutila mbote. Samu, Yandi lunga vwanda diaka ve na nzila yankaka, samu Yandi ke ya kulutila mbote, mpe, Yandi, banzila ya Yandi nionso kele ya kulutila mbote. Beno tala yinki mutindu Yandi salaka yawu.

<sup>54</sup> Moise bokilamaka mpe zabanaka na ntwala samu na kusala kisalu yayi yandi vwandaka na yawu, yandi bakaka—yandi bakaka. Nzambi . . .

<sup>55</sup> Ntangu yayi, mu banza, na lemvo ya beno . . . Mpe mu ke tuba yayi ve kukondwa kubanza. Mu ke tuba yawu kaka, na sika yayi ya malongi, mu—mu zaba kima mosi ve mpe mu zola zaba kima mosi ve kasi Nzambi kaka. Ntangu yayi, mu banza ti ke kisika yina bampangi ya beto ya Mvula ya Nsuka me bulangana, beno me mona, bawu ke tetika maboko na zulu ya mosi na yankaka mpe ke sala bawu ba profete mpe nionso yina. Ntangu yayi, yina ke na Masonuku ve. “Makabu mpe balubokilu ba ke sobaka yawu ve.” Beno me butukaka mutindu beno kele. Na kubanda, beno kele, yina beno kele.

<sup>56</sup> Beno tala ba Pharisien na bawu na bilumbu yina me luta. Bawu vwandaka kaka na mwa nsemo ya fioti, samu bawu lungaka . . . bawu vwandaka na musiku, mpe bawu vwandaka zinga na musiku, kasi bantima ya bawu vwandaka ndombe mutindu yawu lunga vwanda.

<sup>57</sup> Mpe kuvwandaka na kento mosi ya leke, yina vwandaka kento ya pite, kubwa ya yandi . . . *awa* luzingu ya yandi me luta vwandaka ndombe mutindu yawu lunga vwanda, yandi vwandaka na lukumu ve, kasi yandi soolamaka na Luzingu na kati ya ntima ya yandi.

<sup>58</sup> Mpe na ntangu Yesu, Ndinga, kotaka na kisalu, ba Pharisien yina tubaka ti, “Muntu yayi ke Belzebul.” Yinki yawu salaka? Yawu salaka ti mwa nsemo ya bawu kukuma ndombe.

<sup>59</sup> Yesu tubaka, “Tata ya beno, diabulu, mpe beno ke sala bisalu ya yandi.”

<sup>60</sup> Kasi na ntangu kento yayi ya leke, ya nsumuki kwisaka, mpe yandi monaka Ndinga ya Nzambi, yandi zabaka Yawu. Yandi vwandaka zingila Yawu ve, kasi yandi zabaka Yawu. Mpe kaka na ntangu Yawu tubaka na yandi, yandi tubaka, “Mu ke mona ti

Nge ke Profete.” Mpe Yandi . . . Yandi tubaka, “Mu zaba ti Mesiya ke sala mambu yayi.”

Mpe Yandi tubaka, “Mu kele Yandi.”

<sup>61</sup> Yinki yawu salaka? Yawu katulaka ndombe nionso mpe kumisaka yawu mpembe. Samu na yinki? Kuvwandaka na mbuma mosi kuna, mbuma yina zabanaka na ntwala yina vwandaka na . . . Yawu vwandaka dibanza ya Nzambi na ntwala kusalama ya yinza.

<sup>62</sup> Kele na mutindu mosi kaka ya Luzingu ya Kukonda nsuka. Kana beno ke na Luzingu ya Kukonda nsuka, na yawu beno vwandaka na kati ya dibanza ya Nzambi na ntwala kusalama ya yinza. Beno ke kinama ya dibanza ya Yandi, samu ya Kukonda nsuka ke bandaka ve to ke sukaka ve. Beno ke kitini ya kimvwama ya Nzambi, na ntangu nionso. Yawu ke kukitalisa kaka. Yawu ke kuma kaka kieleka. Bawu me bikala kaka na kitini mosi samu na kusala film, yina ke lufwa, positif ke kuma negatif, na yawu beno ke kuma mosi ya Kento ya dibala mpe beno ke na Klisto, kaka mutindu Yandi banzaka. Mutindu bakala mosi na kento ya dibala, bubu yayi, mutindu mosi na Nzambi, Klisto mpe Dibuundu ke vwanda mutindu mosi. Ntangu yayi, yina soolamaka, me bokilama!

Moise butukaka, “mwana ya luswaswanu.”

<sup>63</sup> Biblia tubaka, ti, mosi ya ba profete, Jeremie, Nzambi tubaka, “Na ntwala nge salama na kivumu ya mama ya nge, Mu salaka nge profete ya makanda.”

<sup>64</sup> Jean-Baptiste, samu na yinki, yandi talisamaka na kati ya Masonuku. Esaie, bamvula nkama sambwadi na ntwala ya kwizulu ya yandi, tubaka, “Yandi ke ndinga yina ke bokaka na ntoto ya kuyuma, ‘Sungika nzila ya Mfumu!’” Mpe bamvula nkama yiya na kumonika ya yandi, beto ke mona diaka ti, Malachie tubaka, “Tala Mu ke fidisa munati-nsangu ya Munu na ntwala ya Munu, samu na kusungika nzila na ntwala ya Mfumu.”

<sup>65</sup> Beno me mona, yandi soolamaka na ntwala. Mpe bayina nionso Nzambi pesaka bisalu vwandaka mutindu yina, kana bawu me bokilamaka na Nzambi.

<sup>66</sup> Kana bawu ke kota na nzila ya malongi ya lukolo, yawu ke kaka kima ya kubula munduki, beno me mona, yawu ke kima yankaka ve. Kana yawu ke kima ya kuzwila madia, na yawu beno ke teka bamuswa ya beno ya kinkuluntu samu na kuzwa madia, beno ke kakula samu na organisation mosi to kimvuka mosi. Kasi kana yawu ke Nzambi, beno ke telema na Ndinga, ata yinki mutindu, samu beno butukaka samu na kusimbisa Yawu.

<sup>67</sup> Moise, muntu yankaka lungaka baka kisika ya yandi ve. Muntu yankaka ve lungaka sala kisalu ya yandi. Yandi soolamaka na kusala kisalu yina.

<sup>68</sup> Mpe, bampangi ya babakala, mpe bakento, kana beno ke na Luzingu ya Kukonda nsuka, beno soolamaka na kusala kima mosi. Mbala yankaka samu na kuvwanda mama ya mbote, mbala yankaka kima yankaka, kasi muntu mosi ve lunga baka sika ya beno. Nzambi me salaka sika mosi samu na beno. Kubaka sika ya muntu yankaka ve. Yina ke kumekula ya nzutu, beno me mona, yina ke talisa ti kima mosi ke tambula mbote ve na beno. Ya kieleka, beno vwanda yina beno kele. Beno vwanda kima yankaka ve.

<sup>69</sup> Ntangu yayi, beto ke mona ti Nzambi pesaka bidimbu na Moise samu na kundimisa makieleka mpe lubokilu ya yandi.

<sup>70</sup> Mpe kidimbu nionso ya kieleka, kidimbu nionso ya kieleka, yina Nzambi fidisaka . . .vwandaka landa yawu. Ntangu yayi beno kondwa yayi ve. Yayi ke dilongi ya munu ya nsuka samu na yayi, beno me mona. Kidimbu nionso ya kieleka . . .Ntangu yayi beto ke na bidimbu yina me katuka ve na Nzambi; Satana lunga mekula konso kima yina. Kasi kidimbu ya kieleka, yina Nzambi me tinda, Ndinga ya Nzambi ke fidisa yawu.

<sup>71</sup> Nzambi tubaka na Moise, “Kana bawu kwikila ve na ndinga ya kidimbu ya ntete, na yawu sala kidimbu yina yankaka na ntwala ya bawu. Mpe kana bawu kuwa yawu ve, baka masa mpe tiamuna yawu na zulu ya ntoto.” Mpe yina vwandaka kidimbu ti bawu lungaka sukula na kati ya menga ya bawu mosi kuna.

<sup>72</sup> Bambuka, mpe kaka mutindu mosi Yandi tubaka, “Beno ningisa putulu ya makulu ya beno. Mu ke vwanda na ntima ya yinda na ntwala ya Sodome na Gomorrhe, kilumbu yina, kulutila mbanza yina ke manga beno.”

<sup>73</sup> Ntangu yayi beto ke yinzo-Nzambi ya *bansaka* ve, yayi *ke* Dibuundu. Klisto ke Dibuundu. Beto ke na Klisto. Nzutu ya mansweki ya Klisto, beto me butuka na kati ya Yawu. Beno lenda kota na Yawu ve.

<sup>74</sup> Mu ke na dibuta ya Branham bamvula makumi tanu na tanu, mpe bawu me tubaka na munu ata fioti ve na kukota na dibuta yayi. Mu ke Branham kubanda lubutuku.

<sup>75</sup> Mpe beno ke Muklisto mutindu yina. Beno me butukaka Muklisto, kasi beno me kotaka na yawu ve. Beno me butukaka na kati na yawu. Muntu nionso ke vwandaka na boma ya lubutuku. Bawu ke mutindu ya bawu mosi mpe ya luswaswanu na kupesa mbote, to kusonika nkumbu na kalati mosi, to kulosila bawu masa na mwa dikopa mosi. Yina ke lubutuku ve. Lubutuku ke kima mosi ya boma. Lubutuku ke kima mosi ya mpasi. Mu ke tala ve kana yawu ke na yinzo ya bangulu, to—to na kidikilu mosi, to na hôpital mosi ya banfelele ya kitoko; lubutuku ke kima ya mvindu, mpe yawu ke mvindu na zulu ya beno. Beno zola bika diambu yayi ve, beno zola ve *yayi*, *yina*, to yina *yankaka*, kasi masa ya meso ke sukula mukubu na ilungi ya beno mpe kusala beno muntu ya luswaswanu. Kana beno butuka diaka,

yawu ke vwanda mvindu na zulu ya beno, kasi beno ke kuma diaka kigangwa ya malu-malu. Beno me mona? Bawu ke zolaka yawu ve. Bawu ke zolaka nzila ya kukondwa mpasi, beno zaba, mpe kele na nzila ya kukondwa mpasi ve. Mutindu na mukunga, yandi ke tuba, “Mu ke tambula na bantu fioti ya kiadi ya Mfumu.” Yandi zola vwanda ve yinti ba ke bondilaka.

Ndinga ya Nzambi ke fidisaka kidimbu nionso ya kieleka ya Nzambi.

<sup>76</sup> Ntangu yayi kana muntu mosi kupesa kidimbu mosi na yinsi, to na konso ntangu yina, mpe ndinga yina ke fidisa yawu kele ve Ndinga ya Nzambi, na yawu beno sala keba, beno kwikila na yawu ve. Kana yawu ke mwa lukolo mosi ya nkulu, kana muntu mosi kutelema mpe yandi tuba, mpe yandi talisa kidimbu ya Nzambi, mpe kasi muntu yina ke longa kaka malongi ya yandi ya théologie ya nkulu yina beno vwandaka na yawu na bamvula yayi nionso me luta, Nzambi tumaka ata fioti ve kidimbu yina. Beno tanga Masonuku mpe beno tala kana yawu vwandaka mutindu yina. Beno longuka Masonuku. Mwana-bakala yina kuvutuka, mpe tuba, “Ntangu yayi beto zola kota na *yayi*. Yawu ke diambu mosi me salamaka kubanda ntama.” Beno kwikila yawu ve. Beto ke mona yawu, kaka na mwa ntangu fioti na ntwala, beno me mona. Ve, beno ke kwikila yawu ve.

<sup>77</sup> Ntangu nionso Nzambi ke ndimisaka bidimbu ya Yandi. Kidimbu nionso ya Nzambi ke tubaka ntangu nionso Ndinga ya Nzambi.

<sup>78</sup> Mpe kana yawu ke kaka lukolo mosi yina ya nkulu beno vwandaka na yawu, samu na yinki Yandi lenda pesa beno kidimbu mosi? Beno vwandaka ntete na yawu. Yandi ke meka na kunata beno na nsongi yina. Kidimbu ya stop! Malembe! Beno tala sika wapi beno ke kwenda! Kana beno sala keba ve beno ke bwa na dibulu na nsongi yina. Kana beno zola tekama na nzila, mpe kele ntangu nionso na kidimbu mosi na ntwala beno tekama, samu na kukeba beno na kisumbula mosi. Mutungi ya kieleka ya nzila ke tulaka bidimbu. Mpe beto ke sala nzietelo na Nkembo. Mpe kana kidimbu ke tubila kima mosi yina ya nkulu, yawu ke ya Nzambi ve.

<sup>79</sup> Nzambi ke pesaka bidimbu samu na kukebisa bantu ya Yandi. Bidimbu kele samu na kukebisa bantu ya Nzambi, bidimbu ya Nzambi ke mutindu yina. Bidimbu ya Nzambi me pesama samu na kukebisa bantu ya Nzambi.

<sup>80</sup> Ntangu yayi mulaka ya tiya awa vwandaka kidimbu samu na kubenda bukebi ya profete, yawu vwandaka mutindu ya kumeka, samu profete tinaka ntama ya Nzambi, mpe Nzambi pesaka mulaka ya tiya mutindu kidimbu mosi. Mpe yandi monaka kidimbu yayi ya ngitukulu; yandi tuba, “Mu ke baluka samu na kutala yina ke kidimbu yayi, ti mulaka ke na tiya kasi yawu ke yokama ve.” Ntangu yayi Nzambi vwandaka

benda bukebi ya profete ya Yandi yina tinaka. Yandi vwandaka na yankaka ve, kasi Yandi soolaka Moise samu na kosalu mosi mpe muntu yankaka ve lungaka baka sika ya yandi.

<sup>81</sup> Na nzietelo, mwa bampangi mekaka na kubaka sika ya yandi, beno zaba. Dathan telemaka mpe zolaka sala organisation mosi. Nzambi tubaka na Moise, “Beno kabwana. Mu ke mina bawu.” Beno me mona?

<sup>82</sup> Nzambi ke salaka na muntu mosi. Beno me mona? Beno bambuka yayi ntangu yayi, Yandi vwandaka benda bukebi ya profete, samu na kutula yandi na kisika ya yandi ya kieleka, beno me mona, mpe Yandi pesaka kidimbu ya mulaka ya tiya.

<sup>83</sup> Mpe, tala, Ndinga yina fidisaka kidimbu yina vwandaka Ndinga ya Masonuku. “Mu me wa kudila ya bantu ya Munu, mpe kuboka ya bawu, samu na bamfumu ya bawu ya bisalu ya ngolo, mpe Mu me bambuka nsilulu ya Munu.” Amen. Yina ke sukisa yawu. “Mu me bambuka nsilulu.” Yina vwandaka Ndinga ya Masonuku. “Mpe Mu ke tinda nge kuna. Mu me kwisa samu na kuvulusa bawu, mpe Mu ke tuma nge.”

<sup>84</sup> Beno bambuka ti, Nzambi ke salaka kima mosi ve kukondwa muntu. Beno zaba yawu? Yawu yina ke disakuba samu na bantu. Beno me mona?

<sup>85</sup> Yawu yina vwandaka disakuba ya bawu samu na Yesu. Bawu tubaka, “Nge yina ke Muntu, Nge mosi ke kukisala Nzambi.” Yandi vwandaka Nzambi, kasi bawu lungaka bakula yawu ve. “Mbote, Nge, ke kaka Muntu.”

<sup>86</sup> Yandi tubaka, “Mbote, beno ke bokilaka ba profete, ‘banzambi,’ mpe misiku ya beno zaba yawu. Mpe beno ke bokilaka bawu ‘banzambi,’ samu Ndinga ya Nzambi kwisaka na nzila ya bawu, yinki mutindu beno ke bedisa Munu na ntangu Mu ke tuba ti Mu ke Mwana ya Nzambi?”

<sup>87</sup> Beno me mona, bidimbu, kele samu na kubenda bukebi. Mpe, beno bambuka ti, kana bukebi me bendama mpe yawu ke kaka diambu mosi yina ya nkulu, yawu ke Nzambi ve.

<sup>88</sup> Kasi ntangu yayi Nzambi ke meka na kubenda bukebi ya profete, mpe Yandi ke pesa yandi kidimbu mosi, mpe Ndinga yina fidisaka kidimbu yina vwandaka Ndinga ya Masonuku. “Mu me mona bantu. Mu me wa kudila ya bawu. Mu me bambuka nsilulu ya Munu.”

<sup>89</sup> Ntangu yayi Nzambi ke tuba na nzila ya Ndinga ya Yandi ya nsilulu. Yandi ke tuma kaka profete ya Yandi, samu Ndinga ke kwisaka na profete. Biblia ke tuba ti, Nzambi tubaka, Yandi mosi, ti, “Yandi ke salaka kima mosi ve tii kuna Yandi ke monisa kinsweki na yawu ntete na misadi ya Yandi ba profete.” Beno me mona? Mpe na yawu, kidimbu me pesama, mpe Masonuku me ndimisama, ti yina ke Ndinga ya kidimbu.

90 Beno me mona Ndinga ya kidimbu, ya Moise? Ntete, kidimbu vwandaka mulaka ya tiya; Ndinga vwandaka Masonuku.

91 Moise bakaka yina mutindu kidimbu ya Yandi, mpe kwendaka na Egypte mpe salaka kidimbu yina Nzambi tubaka na yandi; mpe kidimbu vwandaka na Ndinga na yawu, mpe bantu kwikilaka mpe bawu basikaka. Na ntangu nionso bawu tambulaka na yawu, bawu salaka mbote; kasi na ntangu bawu bandaka na kuniunguta samu na Ndinga, na yawu bawu telemaka kisika mosi.

92 Beno bambuka, Israel salaka nzietelo. Beno zaba kitamina bawu salaka? Bawu lendaka... Bawu vwandaka kaka na bitamina makumi yiya, mpe bawu salaka bamvula makumi yiya na yawu. Samu na yinki? Samu bawu bandaka na kuniunguta samu na Ndinga yina basisaka kidimbu. Bawu bakulaka yawu fioti, na ntangu bawu bokaka na simu yina kuna, mpe bawu kinaka na Kimpeve, mpe Moise yimbilaka na Kimpeve, bawu vwandaka kaka na mwa bitamina ya nzietelo. Kasi bawu bandaka na kuniunguta, mpe zolaka sala kima mosi ya luswaswanu; mpe bawu vwandaka bamvula makumi yiya na kati ya ntotu ya kuyuma, mpe bawu fwaka kuna, ya kieleka, samu bawu kwikilaka ve. Nzambi tubaka, “Bawu ke niunguta samu na nge ve, Moise. Bawu ke niunguta samu na Munu.” Yina vwandaka Ndinga ya Nzambi, kasi Moise ve.

93 Beno tala ntangu yayi, Yehowa ke tuba na nzila ya Ndinga ya Yandi ya nsilulu, na yawu Yandi ke tinda ba profete ya Yandi. Ti, kana beno zola mona yina, yawu ke na Genese 15:16. Beto ke mona ti Nzambi tubaka na Abraham, “Mbuma na nge ke zinga na yinsi ya banzenza, mpe mu ke basisa bawu kuna na diboko ya ngolo. Disumu ya nkú ya ba Amorens me fuluka ntete ve.” Bansilulu ya Yandi nionso yina Yandi pesaka, awa Yandi ke benda bukebi ya profete, na nzila ya mulaka ya tiya.

94 Ntangu yayi kana mulaka ya tiya lendaka tuba, “Moise, Nzambi kele Nzambi.”

“Yinga, mu ke kwikila yawu.”

95 “Oh, nge me sala mbote, Moise, simba yawu mbote-mbote. Nge me balaka kento mosi ya mbote; yandi ke kitoko mingi. Ya kieleka nge ke na mwana-bakala ya mbote! Nkembo na Nzambi!” Yina ke lukolo yina kaka ya nkulu. Beno me mona?

96 Kasi Yandi kubamaka samu na kusala kima mosi, na yawu Yandi lendaka kaka kubenda bukebi ya muntu. Mpe Yandi pesaka muntu bidimbu zole ya kusala, mpe tubaka, “Konso kidimbu ke vwandaka na Ndinga mosi.” Yina ke ndimisa ti yawu ke kieleka. Beno tala ntangu yayi yina Bandinga ya bawu tubaka, bima mpe salamaka. Yehowa me kubama samu na kutuba na ntangu yayi.

97 Diaka, kwizulu ya profete kele kidimbu. Beno ke zabaka yawu? Kwizulu ya profete, kele kidimbu, na nsungi mosi.

98 Ntangu yayi, mu ke tubila Munganga ya Kinzambi. Mu ke tubila ve pasteur yina ya kieleka, mwa muntu yina ya mbote. Bawu kele mbote. Bawu ke misadi ya Nzambi.

99 Kasi profete kele kidimbu. Biblia ke tuba mutindu yina awa. Mpe yawu ke kidimbu ya yinki? Yawu ke kidimbu ti Ndinga ya Yandi zola lungisama, kulungisama na nzila ya Ndinga ya kidimbu ya profete yayi.

100 Beno zaba ti, kwizulu ya profete kele kidimbu yina ke kebisa ti lusambusu me finama. Beno zaba yawu? Lusambusu me finama kana profete mosi ke na zulu ya ntoto.

101 Beno bambuka ti, ya kieleka, ntete, yandi ndimisamaka na Nzambi mpe Ndinga ya kilumbu yina, mpe na yawu yandi salaka kidimbu. Mpe beno tala kidimbu yina, yina yandi zabisaka na ntuala. Yandi tubaka, “Kana yawu salama, na yawu beno wa yandi.” Nombres 12:6. “Kana yawu salama ve, beno zimbana yawu.” Yawu lenda vwanda kaka kidimbu ya Masonuku yina Yandi ke pesa.

102 Mpe kidimbu yina Yandi pesaka, na ntangu me luta, kana Yandi ke mutindu mosi mazono, bubu yayi, mpe kukonda nsuka, Yandi ke pesa yawu mutindu mosi konso ntangu. “Ndinga ya Mfumu ke kwisaka na ba profete.” Yawu vwandaka Ndinga. Mpe na ntangu Yesu kwisaka, Yandi vwandaka Ndinga. Mpe Ndinga swasikisaka mabanza mpe bansatu ya ntima, konso ntangu, mpe nionso yina. Beno tala ntangu yayi.

103 Kwizulu ya profete yayi, pesaka kidimbu, ya, “lusambusu me finama,” ntangu nionso.

104 Beto telema samu na mwa bamuniti fioti. Mu ke baka ntangu ya yinda ve. Beto baka kaka zole ntangu yayi, samu na bamuniti kumi. Mpe beto baka kitini yina yankaka ya nsangu, mpamba ve, na bamuniti kumi ke landa.

105 Noé, profete na yinsi—na kati ya yinsi, kidimbu ya kwizulu ya lusambusu. Moise, profete na yinsi, kidimbu ya kwizulu ya lusambusu. Elie, profete na yinsi, kwizulu ya lusambusu. Jean, profete na yinsi, kidimbu ya kwizulu ya lusambusu na Israel; ba tulaka bawu na lweka.

106 Beno bambuka, kidimbu! Yinki kidimbu ke salaka? Kidimbu kele samu na kubenda bukebi, mpe kukubika muntu yina soolamaka, mpe kubasisa bawu na nzila na ntuala kubwa ya lusambusu. Yawu yina Noé salaka, mpe kubikaka muntu yina soolamaka. Samu na bantu yankaka, yinki kidimbu ke sala? Kidimbu, mpe Ndinga ya kidimbu, ke bedisaka mumpani mpe ke kubika yandi samu na lusambusu. Yawu ke kubika muntu yina soolamaka na kutina yawu. Yawu yina ke kidimbu. Kikuma yawu yina bidimbu me pesama, samu na kwizulu ya lusambusu. Bantu yina soolamaka, ke mona yawu.



107 Mutindu kento yina ya leke na ntima ya mbote, mpe na nzutu ya masumu; mpe Pharisien yayi na nzutu ya mbote, kasi na ntima ya masumu. Yawu bedisaka mosi, mpe vulusaka yina yankaka.

108 Mpe lusambusu mosi yina vulusaka Moise, yawu yina bedisaka yinza; malongi ya yandi.

109 Yawu ke kubika muntu yina soolamaka. Muntu yina soolamaka me kubama na yinki? Na ntangu bawu monaka kidimbu yina Nzambi tindaka, bawu talaka na Masonuku mpe monaka ti yawu vwandaka kuna. “Yinga, yawu yayi.” Yinki yawu ke? Lusambusu ya ngitukulu. Na yawu muntu yina soolamaka ke wa Ndinga.

110 Kasi muntu yina soolamaka ve zaba diambu mosi, mpe ke tuba, “Buzoba. Fula! Beto ke baka lukolo yina kaka ya nkulu.” Beno me mona? Mutindu yina bawu salaka na bilumbu ya Luther. Mutindu yina bawu salaka na bilumbu ya Wesley. Mutindu yina bawu—bawu ke sala na ntangu yayi, bawu ke salaka kaka mutindu yina.

111 Kasi yawu ke kidimbu mosi, mpe yawu ke na Ndinga yina ke landa kidimbu. Mpe Ndinga me ndimisama mutindu Ndinga ya Masonuku. Beno zimbanu yina ve ntangu yayi. Ntangu yayi beno kwenda kaka na ntuala, samu mbala yankaka mu lunga mona beno diaka ve.

112 Kana mu lendaka vwanda na mutindu ya kukwisa awa kisika mosi kuna mpe kuvukisa bampangi ya munu nionso, na ntangu reveil mosi ke vwanda ve, mpe kuvwandisa bawu na mwa tenta mosi, mpe kulonga yawu, kilumbu na manima kilumbu tii kuna—tii kuna yawu ke kota mbote-mbote. Kasi Yandi ke pesila yawu muswa ve, mu ke banza. Beno me mona, beto me finama na nsuka. Mu ke kwikila ti beto ke na nsuka na ntangu yayi.

113 Na kati ya buku ya munu kuna, sika wapi mu ke sonikaka mambu. Na mvula 1933, na suka mosi, mu vwandaka kubama na kukwenda na lukolo ya Lumingu, lukolo ya Lumingu ya ba Baptiste sika wapi mu vwandaka pasteur, Mpeve-Santu kwisaka mpe talisaka munu nsuka ya ntangu, mpe talisaka na munu bima sambwadi yina ke salama. Mu sonikaka yawu. Yawu ke na dititi mosi ya nkulu ya jaune.

114 Yandi tubaka na munu yinki mutindu Allemagne ke tunga Kikaku ya Siegfried, mpe yinki mutindu bawu ke bedisa na yawu bantu ya Amerique, bamvula kumi na mosi na ntuala kutungama ya kikaku yina.

115 Yandi tubaka yinki mutindu Mussolini ke telema, mpe yinki mutindu yandi ke kwenda na Ethiopie, mpe yinki mutindu Ethiopie “ke bwa na nsi ya makulu ya yandi.” Mpe yandi ke fwa lufwa ya nsoni, ba ke diembika yandi na makulu, mpe bantu ya yandi mosi ke losila yandi mate.

<sup>116</sup> Mpe mu tubaka, “Kele na malongi tatu: Communisme, Fascisme, mpe Nazisme. Bawu nionso ke suka na kati ya Communisme, na Russie.” Yawu ke vwanda ti Cath- . . . ke bebisa malongi ya Catholique. Beno tala kana yawu ke mutindu yina ve!

<sup>117</sup> Mu tubaka, “Bima ke kwenda na ntwala!” Mu tubaka, “Mu monaka bamatoma ya kufwanana na diki mosi, yawu ke tambula yawu mosi na nzila. Kele na matoma yina ke tambula na babala-bala, yina me twadisama na masini, yawu ke na ntwadisi ve. Mu monaka dibuta mosi ya bantu ya Amerique me vwanda na manima ya ditoma yina mpe ke bula nsaka ya dame.” Ntangu yayi bawu ke na ditoma yina, kasi bawu ke na babala-bala ntete ve samu na kutambusa yawu. Mwa Volkswagen na mutindu ya diki kele ya kulutula kitoko, ya kieleka, mpe mutindu mosi na matoma yankaka nionso. Beno banza, na mvula 1933, tii na ntangu yayi, ba voiture fwananaka na yinki?

<sup>118</sup> Mpe Yandi tubaka diaka na ntwala, ti, mutindu bawu ke sala na ntangu bakento ke kuzwa muswa ya kusoola, mpe yina bawu ke sala. Mpe yinki mutindu ti yinsi yayi, mutindu kifwanikisu mosi, mutindu Israel, kwisaka na yinsi mosi mpe basisaka bayina vwandaka kuna, mpe kumaka bankwa ntoto. Mpe mwa bantinu ya ntete bawu vwandaka na bawu, David mpe Salomon, vwandaka bantinu yina vwandaka banga Nzambi. Na manima ya mwa ntangu fioti, bawu zwaka Achab. Bawu soolaka yandi. Kiti ke . . .dibuundu kumaka na mambu ya yinza. Mpe, beto zwaka Lincoln mosi mpe Washington mosi, tala yina yawu kele bubu yayi. Beno tala sika wapi beto ke kwenda na ntangu yayi. Yinki ke diambu yankaka? Beto ke na nsuka ya ntangu.

<sup>119</sup> Mpe yawu ke kidimbu mosi, na mutindu ya kimuntu, ya kieleka. Yawu ke kubika muntu yina soolamaka; mpe ke bedisa, na lusambusu, mumpani.

<sup>120</sup> “Kana profete yayi ke profete ya kieleka, mpe yina yandi ke tuba ke salama,” Biblia ke tuba, na Nombres 12:6, “beno wa dikebi ya yandi, samu yawu me ndimisama ti yawu ke muntu ve.” Profete kele muntu. Kasi Ndinga yina me katuka na kidimbu ya mazulu kele Ndinga ya Masonuku, yawu me ndimisama, mpamba ve ti yawu ke ndongosolo.

<sup>121</sup> Beno bambuka ti, Biblia sonamaka na ba profete. Na buku ya Zole ya Pierre, diaka, 1:21. Na ba Hebreux 1:1, diaka.

<sup>122</sup> Samu na Moise, Dikunzi ya Tiya, vwandaka kidimbu mosi ti, Ndinga vwandaka pene-pene na kutuba. Dikunzi ya Tiya talisaka ti Ndinga zola tuba. Dikunzi ya Tiya, ke kidimbu mosi. Beno awa lenda bambuka yina salamaka na Houston, ntama mingi ve.

<sup>123</sup> Moise, profete mosi, vwandaka kidimbu mosi samu na Israel, ti nsilulu vwandaka pene-pene ya kulungisama. Na ntangu

Moise kwisaka mpe salaka kidimbu ya profete, bawu zabaka na mbala mosi ti yandi me kwisa samu na kuvukisa bawu.

<sup>124</sup> Tala yinki mutindu Ndinga ya Nzambi ke ya kulutila mbote mpe ya kusungama, mutindu mosi ntangu nionso. Kaka mutindu mu tubaka yawu na nkokila yina, yinki mutindu Urim Thummim, mpe konso kima, vwandaka pesa mvutu na Nzambi ntangu nionso.

<sup>125</sup> Samu na mwa ntangu fioti, beto baka profete yankaka diaka, Jonas. Mu ke na kapu ya ntete awa yina Jonas sonikaka, kapu ya ntete ya profesu ya yandi. Jonas basikaka na kivumu ya baleine, yina vwandaka kidimbu mosi. Beno me mona, bantu yina vwandaka bamimpani. Bawu vwandaka sambala banzambi ya nzadi, mpe nzambi ya bawu ya nzadi vwandaka baleine.

<sup>126</sup> Ntangu yayi bantu mingi ke mekaka na kubedisa Jonas. Mu ke bakaka ntangu nionso sika ya Jonas. Jonas vwandaka ve na nganda ya luzolo ya Mfumu. “Mfumu ke twadisa makulu ya basantu.” Beto ke zolaka kutuba ti, “Yandi ke Jonas.” Kasi beto baka yawu na . . . beto baka yawu na mutindu na yawu ya mbote, mbala mosi. Mu zaba ti yandi zolaka kwenda na Ninive, kasi Nzambi salaka ti yandi baka masuwa ya Tarsis. Mpe Yandi salaka ti mupepe ya ngolo kukwisa na nzadi.

<sup>127</sup> Jonas tubaka, “Beno kanga bansinga na maboko mpe makulu ya munu. Mu ke kisina ya mpasi yayi, kele munu muntu me nata mpasi.” Mpe bawu losaka yandi na nzadi. Mpe mbisi mosi vwandaka tambula na masa, mbisi mosi ya nene minaka Jonas. Mu zaba ti yina ke mpasi mingi samu na bantu ya mayele na kukwikila yawu.

<sup>128</sup> Ntama mingi ve awa, na Louisville, na Kentucky, bamvula kumi me luta, bawu tandaka baleine mosi na zulu ya wagon mosi. Mpe vwandaka na Ricky mosi kuna, yina vwandaka na ndwenga mingi ti yandi vwandaka na mutindu mosi ya kutwadisa yawu. Yandi mekaka na kukanga Biblia luvunu. Yandi tubaka, “Beno zaba, beno waka kingana ya Biblia yina ya nkulu, ti baleine mosi minaka Jonas.” Yandi tubaka, “Beno tala, beno lunga kotisa ve disasi mosi na laka ya yandi, yawu ke ya fioti mingi. Yinki mutindu muntu yina ya mbuta lungaka kota na kivumu ya yandi?” Yandi tubaka, “Beno me mona, yawu ke kaka kingana mosi ya nkulu, mutindu Biblia me fulukaka na yawu.”

<sup>129</sup> Yina samu na munu—munu vwandaka ya kulutila mayele ya kimuntu. Mu tubaka, “Tata, mu zola tuba kima mosi kuna.”

Yandi tubaka, “Yinki nge zola tuba?”

<sup>130</sup> Mu tubaka, “Tala, nge tangaka Biblia mbote ve.” Mu tubaka, “Biblia ke tuba ti yayi vwandaka baleine ya mutindu yankaka. ‘Nzambi salaka mbisi mosi ya nene.’ Yawu salamaka na mutindu yankaka, samu na kumina yandi, yawu yina salaka yawu! Yawu vwandaka ve mbisi mutindu bambisi nionso. Nzambi zolaka sala kisalu ya mutindu yankaka, na yawu Yandi salaka mbisi

ya mutindu yankaka.” Beno me mona? Na yina yandi tubaka diaka ve. Na yawu, kuna, Nzambi salaka kima mosi ya mutindu yankaka.

<sup>131</sup> Mutindu mwana-kento yina, katukaka na tabernacle, na ntangu me luta; na mwa bansuki ya yandi ya kubenda na manima, mpe ya pete, ti ilungi ya yandi kumaka mutindu mwa ditungulu yina ba me katula mpusu. Yandi vwandaka tambula, na Biblia ya yandi.

<sup>132</sup> Nkooko yayi na nkumbu ya Jim Dorsey yina vwandaka zinga na Utica. Yandi vwandaka mumpani, soda mosi ya nkulu, mpe—mpe yandi vwandaka kwikila na Nzambi ve. Mpe yandi tubaka, “Mama ya ntwenia, nge ke kwenda wapi?”

Yandi tubaka, “Mu ke kwenda na yinzo, tata.”

Yandi tubaka, “Yinki yina nge me simba na diboko ya nge?”

Yandi tubaka, “Yawu ke Biblia.”

Yandi tubaka, “Mu banza, nge ke kwikilaka na yawu ve?”  
Mpe yandi. . .

Yandi tubaka, “Yinga, mu ke kwikilaka na yawu, tata.”

<sup>133</sup> Mpe yandi tubaka, “Nge ke kwikilaka na disolo yina ti baleine mosi minaka Jonas?”

Yandi tubaka, “Yinga, ya kieleka, mu ke kwikilaka na konso Ndinga na yawu.”

<sup>134</sup> Yandi tubaka, “Yinki mutindu nge lunga sikimisa yawu na nganda ya lukwikilu, yina beno ke bokila lukwikilu?”

“Mbote,” yandi tubaka, “na ntangu mu ke vwanda na Zulu, mu ke yufula Jonas.” Beno me mona?

Yandi tubaka, “Na yawu yinki ke salama kana yandi vwanda kuna ve?”

<sup>135</sup> Yandi tubaka, “Na yawu nge muntu ke yufula yandi.” Na yawu mu banza yina vwandaka mbote mingi samu na kukanga yinwa ya yandi. Na yawu mu banza yina ke mbote mingi.

<sup>136</sup> Kana Biblia tubaka ti Jonas minaka baleine, mu ke kwikila yawu. Yandi lungaka sala yawu. Yina Nzambi tubaka, Nzambi ke na kiyeka ya kusala yawu, mpe Yandi ke zitisaka ntangu nionso Ndinga na Yandi. Na yawu, Jonas, beto ke sekaka yandi. . .

<sup>137</sup> Kasi beno me bakulaka yawu ntete? Na ntangu mbisi mosi ke zengisa masa, samu na kusosa madia na yandi. Mpe na ntangu yandi ke dia, yandi ke kulumuka na nsi ya masa mpe ke vwandisa bipeki ya yandi na nsi kuna. Beno pesa madia na bambisi ya beno ya mbwaki mpe tala yina ke salama. Na ntangu mwa mavumu ya bawu me fuluka, na yawu bawu ke kulumuka na nsi ya masa mpe ke vwandisa bipeki ya bawu kuna na nsi ya masa, mpe ke vwanda kuna samu na kupema.

<sup>138</sup> Mbote, mbisi yayi ya nene yina salamaka kwisaka mpe minaka profete yayi. Mpe kulumukaka na nsi ya nzadi, mpe mbala yankaka yandi kwendaka na mudindu makumi yiya [75 metres—Mub.]. Yandi kulumukaka na nsi, samu yandi pema kuna na nsi ya nzadi.

<sup>139</sup> Ntangu yayi beto ke banzaka ntangu nionso na Jonas. Mpe bantu nionso ke tubaka, “Ntangu yayi bawu sambilaka samu na munu, kasi diboko ya munu ke mbote ve. Bawu sambilaka samu na munu, kasi mu ke mbote ve.” Na yawu beno nganina Jonas ve.

<sup>140</sup> Ntangu yayi tala bampasi yandi vwandaka na yawu. Ntangu yayi, kima ya ntete, yandi vwandaka na nzadi mosi ya mupepe ya ngolo, mpe yandi vwandaka na nganda ya nzila yina Nzambi tindaka yandi. Maboko mpe makulu ya yandi vwandaka ya kukanga. Bawu losaka yandi na nzadi ya mupepe ya ngolo, mpe ya boma, mpe baleine mosi minaka yandi mpe kulumukaka na nsi ya nzadi. Mpe yandi vwandaka baluka kuna na kati ya biluki, na kivumu ya baleine, mpe bizela ya nzadi pene-pene ya nkingu ya yandi. Mpe kana yandi tala na lweka *yayi*, vwandaka kivumu ya baleine. Kana yandi tala na lweka *yina*, yawu vwandaka na kivumu ya baleine. Bisika nionso yandi talaka, yawu vwandaka kaka kivumu ya baleine. Beno ke tubilaka bampasi, yandi vwandaka na yawu. Kasi beno zaba yina yandi tubaka? Yandi tubaka ti, “Ya ke mambu ya kukondwa mfunu mpe ya luvunu. Mu ke tala yawu diaka ve, kasi mu ke tala kaka na tempelo ya Nge ya santu.”

<sup>141</sup> Mpamba ve, Salomon, muntu kaka na zulu ya ntoto, yina sambilaka na mbiekolo ya tempelo, yandi tubaka, “Mfumu, kana bantu ya Nge ke na kati ya mpasi konso kisika yina, mpe bawu tala na kisika yayi ya santu, na yawu wa bawu na Zulu.”

<sup>142</sup> Mpe Jonas vwandaka na lukwikilu na kisambu ya Salomon. Mpe Nzambi vulusaka yandi na kivumu ya baleine, na manima bilumbu tatu mpe bampimpa tatu. Mbala yankaka yandi salaka mwa tenta mosi ya mupepe kuna na nsi. Mu zaba ve yina Yandi salaka, kasi Yandi kebaka yandi na luzingu na bilumbu tatu mpe bampimpa tatu, mutindu Ndinga ke tuba. Mpe Ndinga kele ya kieleka.

<sup>143</sup> Mbote, kana Jonas, na kati ya bampasi yina, lungaka tala diaka na tabernacle yina muntu salaka, yinki mutindu yawu ke vwanda mbote mingi samu na beno na munu, na nkokila yayi, na kutala na Tempelo yina sika wapi Yesu me telema na diboko ya Ngolo ya kibakala, na Menga ya Yandi Mosi, ke sambidila na mutindu ya kundima ya beto, samu na mwa bampasi ya beto! Beno bedisa Jonas ve, mpe na yawu beno tala yina ke tambula mbote ve na beno. Beno tala na nsilulu, “Nzambi tubaka mutindu yina!” Kana beno ke bana ya Abraham, “Nzambi tubaka mutindu yina!” Yandi pesaka nsilulu, mpe yina sukisaka yawu.

144 Beno tala, bantu nionso vwandaka kuna ke loba mbisi, mpe ke benda bampwasa ya bawu mpe nionso yina. Na manima mwa ntangu fioti, baleine, nzambi ya nzadi mataka na zulu ya masa, mpe kwendaka mbala mosi na lweka ya nzadi. Bantu nionso fukamaka. Nzambi zaba mutindu ya kusala mambu. Mpe yandi kwendaka mbala mosi na lweka ya nzadi mpe basisaka ludimi ya yandi, mpe, na ntangu yandi salaka mutindu yina, profete mosi basikaka na yinwa ya baleine. Profete! Nzambi ya bawu lukaka profete kuna na lweka ya nzadi. Na ngitukulu ve ti bawu balulaka bantima ya bawu. Beno me mona?

145 Yina vwandaka kidimbu mosi. Baleine vulusaka Jonas, yina vwandaka kidimbu mosi. Yinki yandi salaka? Yina vwandaka kidimbu ya Nzambi. Yinki Ndinga tubaka? “Beno balula bantima ya beno kana ve beno ke fwa, na manima bilumbu makumi yiya.” Kidimbu ya Nzambi; Ndinga ya Nzambi! Ntangu nionso, kana Nzambi kutinda kidimbu mosi, Nzambi ke fidisa Ndinga na Yandi na manima ya kidimbu yina. Beno bambuka, “Beno balula bantima ya beno, kana ve mbanza yayi nionso ke fwa na manima bilumbu makumi yiya.”

146 Profete Jean kwisaka na zulu ya ntoto, na manima bamvula nkama yiya na ntangu profete mosi vwandaka diaka ve; kidimbu mosi na manima bamvula nkama yiya, ya kwizulu ya yandi. Mwa ntangu fioti ya kulenga!

147 Ntangu yayi beno ke bakula yina mu ke tuba kana beno ke ya kimpeve. Bika ti Nzambi kuzibula luzabu ya beno. Bantangu yikwa me luta?

148 Israel vwandaka na profete ve, bamvula nkama yiya, mabuundu mvwalanganaka, mpe Jean kotaka na kisalu. Jean vwandaka profete, kidimbu mosi ti Mesiya vwandaka pene-pene na kutuba na manima ya yandi. Beno tala. Samu, Malachie 3 tubaka, “Mu ke tinda munati-nsangu ya Munu na ntwala ya Munu, samu na kuyidika nzila, mpe kusungika bantu.”

149 Beno tala Jean, kimuyimi vwandaka ve na kati ya yandi. Yandi bakaka nkembo mosi ve. Bawu mekaka na kubokila yandi Mesiya; kasi yandi tubaka, “Mu ke na kiyeka ve ya kufungula bansinga ya basapatu ya Yandi.”

150 Kasi kaka na ntangu Yesu kwisaka, Yandi vwandaka na kidimbu mosi, Dikunzi ya Tiya, Nsemo mosi na zulu ya Yandi, kulumukaka na mutindu ya yembe mpe Ndinga mosi tubaka, “Yayi ke Mwana ya Munu ya zola, na Yandi Mu me tula ntima.”

151 Beno bambuka, mpe na mbala mosi Jean tubaka, “Yandi ke mata. Mu ke kulumuka.” Yandi talisaka Dibuundu na Klisto. Amen.

152 Yawu tubamaka na beto ti, na bilumbu ya nsuka, yina ke salama diaka! Nsangu mosi ke basika, yina ke talisa Mesiya na bantu. Mpe yawu ke salama na mutindu mosi ti, bawu ke vwanda na ngitukulu mutindu bawu salaka ntete. Yandi silaka yawu.

Kapu yankaka ya Mathieu, ya Malachie, ke tubila beto yawu. Beno tala.

<sup>153</sup> Bawu yufulaka kiuvu samu na yawu. Nkadulu ya Jean me fwanana na mpeve ya Elie. Beno bambuka ntangu yayi ba profete yayi zole.

<sup>154</sup> Ntangu yayi, Elie vwandaka muntu yina kwisaka na ntangu Israel vwandaka na chaos.

<sup>155</sup> Achab vwandaka ntinu. Mpe bakento nionso bakaka Jezabel mutindu mbandu mosi, mpe na mutindu ya bansuki yina ke bebisa bayintu mpe nionso yina, kaka mutindu beto ke na yawu bubu yayi. Mpe bawu nionso landaka mbandu ya Jezabel. Mpe ba pasteur banzaka ti nionso yina vwandaka mbote. “Beno bika bawu. Beno bika bawu sala yawu.”

<sup>156</sup> Mpe na ntangu yina, Nzambi basisaka muntu mosi na ntoto ya kuyuma, na nkumbu ya Elie. Mpe beto zaba ve sika yandi katukaka. Yandi fwananaka na lukolo mosi ve. Kasi yandi basikaka, mpe bedisaka mwa bima yina nionso. Yandi bedisaka ba systeme nionso.

<sup>157</sup> Kana yandi kwisa, bubu yayi, yandi ke bedisa diaka ba systeme ya beto.

<sup>158</sup> Yandi bedisaka ba Jezabel nionso. Mpe na nsuka, yandi, kotisaka profete na kidi-kidi. Yandi tinaka, mutindu mosi na Jean; mpe lalaka na nsi ya bansimbulu ya yinti na ntangu Jezabel zolaka kufwa yandi. Yandi yinaka yandi.

<sup>159</sup> Na yawu beto ke mona ti na ntangu Jean kwisaka diaka, kuna na ntoto ya kuyuma, muntu yina zola mingi ntoto ya kuyuma, yandi kwisaka na nsangu yina bedisaka bakento yina fwaka makwela mpe kwelaka, mpe kwelaka diaka, yandi bebisaka yawu. Yandi katukaka na lukolo mosi ve. Yandi katukaka na Nzambi, muntu yina Nzambi tindaka. Mpe yandi bedisaka bakento ya bilumbu yayi, yandi teleminaka bawu na ngolo nionso, mpe yandi vwandaka na nsoni ata fioti ve. Kasi yandi vwandaka tuba ntangu nionso ti ntangu me kuma pene-pene, Mesiya me finama na kutuba. Beno tala yawu.

<sup>160</sup> Ntangu yayi beno fwanikisa ntangu ya ntete ya kwizulu ya Elie na ba profete ya bubu yayi, yina ke pesa muswa na ba Jezabel ya bawu na kuzengisa bansuki ya bawu, mpe kulwata bakupé, kunwa makaya, kusala konso kima yina bawu zola sala, mpe kutwadisa bawu ndambu na ndambu. Kana yandi tuba kima mosi, yandi ke bika yandi, mpe yandi ke baka bakala yankaka. Ba ke twadisa bawu na ba credo yina me salama na bantu; yina ke nsoni, malongi ya muntu. Mpe, na kusalaka mutindu yina, bawu ke sala ti misiku ya Nzambi kusala kisalu na yawu ve, samu bawu lunga kota na dibuundu mosi mpe kufula na kutubaka ti bawu ke Baklisto, mpe ke lomba bamuswa ya bawu mpe ke tuba ti bawu ke Baklisto, mpe ke fula kaka mutindu yina.

Yawu yina bawu ke zolaka. Yawu yina bawu salaka na ntangu me luta.

<sup>161</sup> Kasi, beno bambuka ti, kele na ntangu ya mutindu yina, mutindu Nzambi silaka yawu na Malachie 4, ti Yandi ke lungisa diaka Ndinga. Ya kieleka. Beno tala sika wapi beto kele bubu yayi, kaka mutindu yawu vwandaka na ntangu ya Jean, kaka mutindu yawu vwandaka na bantangu yankaka.

<sup>162</sup> Beno tala na ntangu Amos yayi ya nkooko basikaka, nkundi yayi ya nkooko. Beto zaba ve sika wapi yandi katukaka. Yandi vwanda muvungi. Nzambi basisaka yandi na bilanga ya mameme mpe bilanga ya bangombe, mpe, mpe longaka yandi. Mpe na ntangu yandi kumaka na Samarie, na kilumbu yina mpe mataka na zulu ya mingo yina, mpe talaka kuna na nsi. Mpe nsemo ya mwini vwandaka sema na zulu ya dibandi ya yandi, mpe yandi vwandaka na mika ya mpembe na ilungi ya yandi, mpe meso ya yandi telemaka sika mosi mpe monaka diaka mbote ve. Meso ya yandi ya santu kumaka na lubungi, yawu kele ve samu na yina vwandaka mona bizieti yina kwisaka na mbanza, kasi samu mbanza ya muvimba fulukaka na masumu.

<sup>163</sup> Nani ke mwa muntu yina ya nkulu, yina me zabana mbote ve? Yinga, yawu ke Amos, profete. Yandi pesaka profesi na bilumbu ya Jeroboam ya Zole, ntinu mosi ya kimpumbulu, yandi bikaka bantu kusala nionso yina bawu zola. Banganga-nzambi nionso vwandaka ndima yawu. Bawu tungaka bayinzo-Nzambi ya kitoko mingi. Bawu vwandaka lwata bilele ya kitoko mingi. Bakento ya bawu vwandaka na kimuntu ve. Bawu vwandaka lwata konso mutindu yina bawu zola. Bizieti katukaka bisika nionso, samu na kutala bakento ya kitoko mpe yina vwandaka sala yina bawu me zola.

<sup>164</sup> Kaka Etats-Unis ya bilumbu yayi, bawu ke banza ti bawu kele bantu ya Nzambi. Muntu mosi ve ke telemina yawu. Yawu ke monana ti kima mosi ke tambula mbote ve na kati ya bantu. Ku- . . .

<sup>165</sup> Bubu yayi, bamvula kumi na nana me luta! Rebekah ya munu ke na bamvula kumi na nana, bubu yayi. Bamvula kumi na nana, mu ke tambula na yinsi yayi, samu na kubedisa bima yayi. Mpe na ntangu mu ke vutukisa na manima, mvula na manima ya mvula, kele na bakento mingi yina ke zengisa bansuki kulutila na ntangu ya ntete mu bandaka.

<sup>166</sup> Mvula mosi me luta, longi mosi ya Pentecotiste, ya lukumu nataka munu na kati ya yinzo mosi, ya kitoko, yina me zabana mbote, muntu yina me zabana na yinza ya muvimba. Yandi tubaka mu . . . “Mpangi Branham, bika ti mu tetika maboko na zulu ya nge mpe mu sambila samu na nge.”

Mu tubaka, “Mu ke bela ve.”

<sup>167</sup> Yandi tubaka, “Kasi kima mosi ke tambula mbote ve.” Yandi tubaka, “Mpangi Branham, nge ke bebisa ministere ya nge.



Muntu mosi ve ke vwanda na ngwisani na nge. Na mpamba ve ti balongi ke vwandaka na ngwisani na nge ve; na mutindu nge ke bedisaka bakento.” Yandi tubaka, “Bantu ke bokilaka nge profete.”

Mu tubaka, “Mu me tubaka ata fioti ve ti mu ke mosi yina.”

168 Yandi tubaka, “Kasi bawu ke kwikilaka ti nge ke mosi yina.” Yandi tubaka, “Mu ke kwikilaka mutindu mosi.” Yandi tubaka, “Nge me bokilama na kusambila samu na bambevo.” Yandi tubaka, “Sambila samu na bambevo, mpe bika bakento yina na kimpwanza. Nge ke niongisa bansatu ya bawu.”

Mu tubaka, “Yinki mutindu?”

169 Yandi tubaka, “Mumbandu kutubila bawu samu ba ke zengisa bansuki ya bawu mpe nionso yina.”

Mu tubaka, “Yawu ke yimbi.”

170 Biblia ke tuba ti, “Kento yina—yina ke zengisa bansuki ya yandi, bakala ya yandi ke na muswa ya kufwa makwela na yandi.” Ya kieleka. “Yandi ke zitisaka ve bakala yina kele yintu ya yandi.” Biblia ke tuba mutindu yina. Ntangu yayi mu zaba ve kana beno ke zolaka yawu to ve, kasi Biblia ke tuba mutindu yina, na buku ya Ntete ya ba Corinthiens.

171 [Kisika ya mpamba na bande—Mu.] . . . ya kukangama na nzutu mutindu mpusu ya nzutu ke na nganda. Na yawu bawu—bawu kwisaka pene-pene, mpe tubaka, “Kasi, Tata Branham, yina ke mutindu mosi kaka ya bilele kele na zandu.”

172 Bawu ke tekisaka bitenda ya bilele mpe bamasini ya bilele. Kele na pardo ve. Bakento ya ba Amish mpe ba Dunkard ke lwataka yawu diaka. Ya kieleka. [Dibuundu me bula maboko—Mu.]

Mpe yinki salamaka? Bawu ke basika kuna mpe ke zinga na mutindu ya yimbi.

173 Kento mosi tubaka, “Mbote, Tata Branham, mu ke lwataka ve bakupé. Mu ke lwataka ba- . . .” Yinki ba ke bokilaka yawu, pantalon cor- . . . [Mpangi-bakala mosi ke tuba, “Pantalon corsaire.”—Mu.] Yinga. Yandi tubaka, “Mu ke lwataka yawu.”

174 Mu tubaka, “Yina ke ya kulutila yimbi.” Mu tubaka, “Biblia ke tuba ti, ‘Yawu ke busafu samu na kento na kulwata bilele ya babakala.’” Mpe yawu ke nzanzi na kutala Etats-Unis ya bilumbu yayi! Beno me mona? Ya kieleka.

175 Bika mu tuba na beno kima mosi, mpangi-kento. Beno lunga vwanda bunkete mutindu lis, na ntwala ya bakala ya beno mpe nkundi ya beno, kasi na Kilumbu ya Lusambusu beno ke pesa mvutu samu beno salaka pité. Yesu tubaka ti, “Konso muntu yina me tala kento mosi, samu na kulula yandi, me sala ntete pité na yandi.” Kana nsumuki mosi talaka beno, mpe beno ke pesa

mvutu na Kilumbu ya Lusambusu. Beno mosi kukitalisaka na ntuala ya yandi. Beno sala yina beno me zola. Uh-huh.

<sup>176</sup> Samu na yinki kento mosi ya santu lungaka lwata mutindu yina? Na yawu beno ke tuba ti beno ke na Mpeve-Santu samu beno tubaka bandinga ya malu-malu mpe pamukaka na zulu mpe na ntoto. Yayi, mpe, mu monaka mimpani ke sala mutindu yina, ba Hottentots. Mpeve-Santu kele bunkete, busantu, ntama ya masumu. Ya kieleka.

<sup>177</sup> Bakala yayi tubaka, “Kana nge ke. . .Bawu ke kwikilaka ti nge ke profete. Samu na yinki nge ke longaka bawu ve mutindu ya kuzwa makabu ya nene ya kimpeve, mpe yinki mutindu kusala bima ya Nzambi? Samu na yinki nge ke longaka na bawu ve bima yayi kana nge ke profete?”

<sup>178</sup> Mu tubaka, “Yinki mutindu mu lunga longa bawu bantalu kana bawu me longuka ve ABC ya bawu?” Nge zaba yina ABC zola tuba? “Always Believe Christ” [Kwikila Kaka Klisto—Mub.] Uh-huh. Yinki mutindu beno lunga sala yawu? Beno me mona, beno zola mata na zulu *kuna*, na kisika kubanda *awa* na nsi.

<sup>179</sup> Nzambi ke tunga Dibuundu ya Yandi na zulu ya fondasio ya Yesu Klisto, mpe yina zola tuba ti Biblia. Na nganda na yawu, bisika yankaka nionso kele mfututu. Nzambi ke sobaka ve. Nkadulu ya Yandi ke sobaka ve.

<sup>180</sup> Yandi salaka bakento luswaswanu na babakala, mpe babakala luswaswanu na bakento. Yandi lwatisaka bawu na mutindu ya luswaswanu, mpe yandi zola ti bawu vwanda mutindu yina. Beno me mona? Bakento zola fwanana na babakala, mpe babakala zola fwanana na bakento. Oh, la la! Kubeba ya mutindu yayi! Yawu ke. . .Mpe nionso yayi, ke monana ti yawu me kanga bantu, mpe beno lunga soba yawu ve. Yawu ke monana mutindu monstre mosi ya nene, mudidi mosi ya nene; kana beno lunga bakula yina mu ke tuba, na kimpeve. Monstre me kanga bawu, mpe bawu—bawu lunga kwenda ntama na yawu ve; Hollywood ya mingi, television ya mingi, buzoba ya mingi. Beto ke kaka na bima ya kubeba. Na ngitukulu ve ti, “Kana kosalu vwandaka nkufi ve, samu na yina Soolamaka, muntu mosi ve lendaka vuluka.”

<sup>181</sup> Beno ke tuba, “Mu me zabaka yawu ata fioti ve.” Mbote, ntangu yayi beno me zaba yawu, kubanda ntangu yayi. Beno me mona? Yina ke. . .Kulutila mbote mu sukisa awa. Beto vutuka na manima. Beno simba yayi.

<sup>182</sup> Jean vwandaka kidimbu. Mpe beno bambuka ti, mutindu Nzambi salaka yawu na mbala ya ntete, kele mutindu yina Yandi ke sala yawu diaka. Yandi silaka yawu. Ntangu yayi, Nzambi me salaka ata fioti ve na kimvuka ya bantu, na ntangu nionso, samu na kusala mambu yayi.

<sup>183</sup> Beno bambuka ti, kuvwandaka na kimvuka mosi na ntangu mosi, yina, muntu ya nene yina na nkumbu ya Achab, vwandaka

na yawu. . . yandi vwandaka na ba profete Israelite nkama yiya. Ntangu yayi, bawu vwandaka ba profete ya mimpani ve. Ba profete nkama yiya ya Israel. Bawu nionso vwandaka na ba diplome ya bawu mpe nionso yina, mpe bawu vwandaka na lukolo ya nene.

<sup>184</sup> Kuvwandaka na muntu mosi ya santu na nkumbu ya Josaphat, yina vwandaka ntinu ya Juda, mpe yandi kwendaka kuna. Mpe kele kisika yina mukwikidi na mumpani kuvukanaka. Mambu tambulaka mbote ve.

<sup>185</sup> Mpe yandi tubaka, “Ramoth na Galaad. . .” Beno tala yayi ntangu yayi, wapi mutindu yawu lunga vwanda ya kieleka. Yandi tubaka, “Ramoth na Galaad ke ya beto, kuna na zulu. Kitini yina na zulu ya yinsi, kele ya beto.” Na ntangu Josué, kabulaka bitini ya ntoto, yandi pesaka yawu na Israel. Mpe ba Phillistin, mimpani, kwisaka kuna mpe botulaka bawu yawu. Yandi tubaka, “Yawu ke ya beto.”

<sup>186</sup> Ntangu yayi beno tala yinki mutindu, na kisina na yawu, bantu lunga vwanda na muswa mpe kuluta na lweka na Yawu. Ntoto yina vwandaka ya Israel. Kasi bansilulu nionso ya Nzambi, ke vwandaka na misiku, bampangi, beno me mona, “Kana bawu tambula na ntwala ya Nzambi.”

<sup>187</sup> Beno wa ntangu yayi. Yandi tubaka, “Nge lunga kwisa na munu, mpe nge sadisa munu samu na kubotula ntoto yina? Mbote, kuna, bana ya ba Phillistins ke fulusa mavumu ya bawu kuna, na masangu ya Israel.” Yina ke mbote na kulanda Masonuku. Yandi tubaka, “Sadisa munu na kukwenda kuna mpe kubotula yawu.”

<sup>188</sup> Yandi tubaka, “Mbote, munu. . .” Kele kisika yina yandi salaka kifu ya kulutila nene: “Bapusu ya munu kele ya nge, bantu ya munu mpe kele ya nge. Mu ke kwenda na nge.”

<sup>189</sup> Mpe na yawu Josaphat bandaka na kubanza, beno zaba. “Yandi tubaka, samu na yinki ve beto me yufula Mfumu samu na yawu na ntwala beto kwenda?”

<sup>190</sup> Achab tubaka, “Oh, yinga,” “ya kieleka. Uh-huh. Na lemvo ya nge. Mu—mu vwandaka na dibanza yina.”

“Kele na profete ve kisika mosi kuna?”

<sup>191</sup> “Oh, yinga. Mu ke na—mu ke na kibuka ya bawu awa, ya kitoko mingi yina nge me monaka ntete ve. Bawu nionso ke lwataka bilele ya kitoko mingi. Bawu me longukaka mingi. Mu me longusaka bawu, mbote—mbote. Beto ke kwenda baka bawu.”

<sup>192</sup> Na yawu bawu kwendaka kuna. Mpe bawu nionso vukanaka. Bawu vwandaka bantu ya luvunu ve. Bawu sambilaka mpe sambilaka mpe sambilaka, tii kuna bawu zwaka vision mosi.

<sup>193</sup> Mpe bawu basikaka. Mpe mosi na bawu salaka misengu zole ya bibende. Yandi tubaka, “Na nzila ya yayi nge ke basisa ba Phillistins, to ba Assyriens, nge ke basisa bawu na

mbanza.” Yandi tubaka, “MUTINDU ME TUBA MFUMU. Mata kuna, Mfumu kele na nge.” Bawu nionso, na ngwisani, kuna, twadisamaka na mpeve. Ba profete ya Israel tubaka, “Mata kuna, Mfumu kele na nge.” (Beno ke tuba, “Yina ke Masonuku?”) “Nzambi pesaka kimvwama yayi na bantu ya beto, mpe mbeni me baka yawu. Nge ke na muswa ya kukwenda botula yawu.”

Ntangu yayi, beno ba Pentecotiste, mu zola ti beno baka dilongi awa.

<sup>194</sup> Kasi, Josaphat, yina vwandaka muntu mosi ya santu, yandi tubaka, “Kima mosi ke tambula mbote ve.” Yandi tubaka, “Beno ke na yankaka ve?”

<sup>195</sup> “Yankaka diaka, na nganda ya nkama yiya ya ba profete yayi me longukaka mbote mingi yina kele awa?” Bawu vwandaka mingi mutindu bantu yayi me vwanda awa na ntoto. “Bawu telemaka na ngwisani, mpe tubaka, ‘MUTINDU ME TUBA MFUMU.’ Botula yawu, mpe tubaka, ‘Josué pesaka ntoto yina na beto. Yawu ke ya beto. Kwenda botula yawu!’”

<sup>196</sup> Kasi Josaphat lombaka mosi yankaka. Yandi tubaka, “Kele na yankaka ve na nzila na yandi beto lunga yufula Mfumu?”

<sup>197</sup> Yandi tubaka, “Oh, kele na mosi yankaka, kasi,” yandi tubaka, “mu ke yinaka yandi.” Uh-huh, uh-huh. Yandi tubaka, “Yandi ke Michée, mwana ya Jimla.” Yandi tubaka, “Mu ke yinaka yandi. Yandi ke tubaka na munu kaka mambu ya yimbi.”

Yandi tubaka, “Bika ti ntinu kutuba mutindu yina ve. Beno bokila yandi.”

<sup>198</sup> Na yawu bawu tindaka bantu ya mbangu kuna. Mpe fioti ya bawu tubaka, “Ntangu yayi, Michée, mu zola tuba na nge kima mosi. Ntangu yayi, nge zaba ti bawu basisaka nge, . . .-saka nge na kimvuka, ntama mingi ve, samu nge ke tubaka kaka mambu ya yimbi na bantu. Ntangu yayi kana nge zola baka diaka kalati na nge ya kimvuka, tuba kaka mutindu mosi na bawu, mpe, oh, bawu ke sepela na nge.”

<sup>199</sup> Kasi yawu salamaka ti ya kieleka yandi vwandaka profete. Yandi tubaka, “Mutindu Mfumu Nzambi kele ya moyo, mu ke tuba kaka yina Nzambi ke tula na yinwa ya munu.” Oh! Nzambi sakumuna muntu yayi. Yandi tubaka, “Beno vingila tii na nkokila yayi, mpe mu ke mona yina Mfumu ke tuba na munu.”

<sup>200</sup> Na suka yina landaka, yandi tubaka, “Mata kuna, kasi mu me mona Israel ya kumwangana mutindu mameme yina ke na muvungi ve.” Mpe yandi bakaka vision na yandi mpe fwanikisaka yawu na yina Elie tubaka, na yina ke salamina Achab. Yinki mutindu Yandi lunga sakumuna yina me singamaka? Ata yinki mutindu . . .

<sup>201</sup> Beto ke yinsi mosi ya santu. Dibuundu ya ba Pentecotiste, Baptiste, mpe Methodiste, mpe nionso yina, kele dibuundu ya Baklisto, kasi yinki mutindu beno lunga sakumuna yina Nzambi

me singaka? “Mu ke kipé ve,” beno ke tuba, “Mu—mu kotaka na *yayi*. Mu salaka *yayi*.” Kele na kima ya kusala na yawu ve. Beno ke tala na yina beno salaka. Beno tala ba Pentecotiste, yinki mutindu bawu me katula bikaku. Beno tala yina beno lendaka vwanda, mpe beno tala yina beno kele na ntangu *yayi*. Na ngitukulu ve ti, meso kele, meso me fwa.

<sup>202</sup> Mpamba ve yandi, Achab. . . Nganga-Nzambi *yayi* bulaka yandi na yinwa. Mpe yandi tubaka, “Beno kanga yandi,” mpe Achab tubaka, “beno tula yandi kuna na manima na kati ya boloko. Na ntangu mu ke vutuka na ngemba, mu ke tala diambu ya muntu *yayi*.”

<sup>203</sup> Yandi tubaka, “Kana nge kwisa vutuka, tuba ti Nzambi me tuba na munu ve.” Uh-huh? Beno me mona? Kuvwandaka na profete kuna, kuvwandaka na kidimbu mosi; kuvwandaka na Ndinga ya Yandi. Mpe kumanga na kutumama na Yawu nataka lusambusu.

<sup>204</sup> Mpeve-Santu ke profete na beto bubu *yayi*. Kumanga na kuwa Ndinga ya Yandi? Yandi me ndimisama na Masonuku, ti Yandi lenda tuba bima *yayi*. Yesu Klisto, na mutindu ya Mpeve-Santu!

<sup>205</sup> Nzambi salaka kaka na muntu *yayi*. Tala, Nzambi ke salaka ata fioti ve na kimvuka ya bantu; yawu ke kaka na muntu mosi. Elie vwandaka kimvuka ve. Jean vwandaka kimvuka ve. Bawu vwandaka kimvuka ve to denomination mosi ve, to mosi na yawu ve. Kasi bawu nionso zole bedisaka bima ya mutindu *yayi*. Ya kieleka. Jean tubaka, “Beno meka ve na kutuba ti Abraham ke tata ya beto. Nzambi ke na kiyeka ya kubasisa bana samu na Abraham na nzila ya matadi *yayi*.”

<sup>206</sup> Mpe kidimbu ya ntangu ya nsuka ke vwanda na Ndinga ya ntangu ya nsuka. Mpe kidimbu ya ntangu ya nsuka ke vwanda mutindu yina zabisamaka na kati ya Biblia. Mpe Ndinga ya ntangu ya nsuka, yina ke fidisa kidimbu ya ntangu ya nsuka, ke ndimisama na Masonuku, mpe ke vwanda Masonuku yina silamaka.

<sup>207</sup> Mpamba ve beto me tanga na Luc 17 yina ke vwanda kidimbu ya ntangu ya nsuka, yawu ke vwanda mutindu yawu vwandaka na Sodome, nsilulu mosi. Mpe beto ke na Sodome na kimuntu, samu na yinki beto lunga kwikila ve kidimbu ya kimpeve awa? Kana beno lunga tala Masonuku, diaka, Luc 17 kele kidimbu, mpe Malachie 4 kele Ndinga. Kidimbu vwandaka mutindu ti Nzambi monisamaka na nzutu, ke zaba binsweki ya ntima; mpe Ndinga ya Malachie 4 vwandaka balula bantu ntama ya ba credo ya bawu, samu na kuvutula bawu na Lukwikilu ya batata. Yawu yina kidimbu.

<sup>208</sup> Beno zaba yawu? Mu ke sukisa ntangu *yayi*. Ya kieleka, bidimbu ke ndimama ntangu nionso; kasi, Ndinga, oh, ve.

Ndinga yina ke fidisa kidimbu, bawu zola sala kima mosi ve na yawu. Yinga.

<sup>209</sup> Kidimbu ya Yesu, mutindu Mesiya, kele kubelusa bambevo, bawu ndimaka yawu. Kasi kilumbu mosi Yandi tubaka, “Munu na Tata kele Mosi.”

<sup>210</sup> Oh, la la, bawu ndimaka Ndinga yina ve. Bawu tubaka, “Nge ke kukisala Nge mosi Nzambi, mutindu mosi na Nzambi.”

Yandi tubaka, “Mu ke Mwana ya Nzambi.”

<sup>211</sup> “Oh, la la, yinki mutindu Nzambi lenda vwanda na Mwana?” Beno me mona? “Ntama dibanza yina ti Nzambi kele na Mwana!”

<sup>212</sup> Kasi, beno me mona, bawu kwikilaka na kidimbu, bambevo lunga beluka, mpe, oh, yina vwandaka kitoko mingi, yina vwandaka mbote mingi. Kasi samu na Ndinga, bawu lungaka kwikila ve na Ndinga. Yinki bawu salaka? Bawu tulaka Yandi na nganda.

<sup>213</sup> Mpe beno zaba yawu? Biblia ke tuba na beto, na Apocalypse kapu 3, na Nsungu yayi ya Dibuundu ya Laodicée, ti Yandi ke sala kima ya mutindu mosi. Yandi vwandaka na nganda ya dibuundu. Yina ke Ndinga me monisama. Yandi vwandaka Ndinga yina me monisama. Yandi ke kaka Ndinga yina me monisama.

<sup>214</sup> Kana beno lunga kwikila kidimbu ya Sodome, ya Luc, kana beno lunga kwikila yina, na yawu samu na yinki ve kukwikila na Ndinga ya Malachie 4? Beno me mona, samu na yinki ve beno, beno? Yawu lunga ndimisama. Mutindu mosi kaka yawu lunga salama kele... Kidimbu lunga ndimisama, kasi beno ndima Ndinga.

<sup>215</sup> Moise bakaka lutumu ya kukwenda kuna, na kimuntu, samu na kubaka kidimbu ya kimpeve mpe kuvutula bantu na nsilulu ya batata.

<sup>216</sup> Malachie 4 ke vutula bantu “na Lukwikilu ya batata.” Oh, beno vutuka, na yina ya beno, O kifwa-meso mpe yina me zimbana!

<sup>217</sup> Samu na kumanisa, mu ke tuba, ndinga yayi ya nsuka. Profete tubaka, “Nsemo ke vwanda na ntangu ya nkokila.” Beno tala, yandi tubaka, “Ke vwanda na kilumbu mosi yina ba ke bokila ve kilumbu to mpimpa.” Beno wa ntangu yayi. Mu ke sukisa. “Ke vwanda na kilumbu mosi...” Bika yayi kota na mudindu, mpe bika ti Nzambi kutula yawu na ntima ya konso muntu awa, na nkokila yayi, na kati ya yinzo yayi. Profete tubaka, “Ke vwanda na kilumbu mosi yina ba ke bokila ve kilumbu to mpimpa, mutindu kilumbu ya mudidi, ya mvula, ya lubungi. Kasi,” yandi tubaka, “Nsemo ke vwanda, na ntangu ya nkokila.”

<sup>218</sup> Ntangu yayi, beno bambuka ti, mwini ke basikaka ntangu nionso na Este mpe ke kwendaka na weste. Civilizasio ke

landaka mwini. Beno zaba yawu. Mpe, beno zaba ti, mwini mosi yina ke basikaka na Este kele mwini mosi yina ke lalaka na Weste. Ntangu yayi, civilizasio salaka nzietelo mutindu mosi na mwini, mpe ntangu yayi Este na Weste me kutana. Beto ke na Côte Weste; Este na Weste.

<sup>219</sup> Mpe, bambuka ti, Nsangu ya mbote salaka nzietelo mutindu mosi. Yawu basikaka na Este, kwizulu ya Yesu Klisto, M-w-a-n-a [Na Kingelesi: S-o-n—Mub.], m-w-i-n-i [s-u-n] ve. M-w-a-n-a, Mwana ya Nzambi, basikaka na Este, mpe kwendaka na bantu ya Este.

<sup>220</sup> Mpe ntangu yayi kuvwandaka na kilumbu mosi bantu kotaka na dibuundu, mpe salaka ba denomination, kaka nsemo mingi samu na kumona, “Mbote, beto ke vwanda na dibuundu mosi. Beto ke tunga *yayi*. Beto ke tunga lukolo. Beto ke tunga hôpital. Beto ke pesa malongi. Beto ke vwanda na seminere.” Beto ke vwanda na nsemo ya mingi samu na kusala yawu.

<sup>221</sup> Kasi, beno bambuka, Biblia ke tuba ti, profete ya Mfumu, na kati ya Biblia, yina ke MUTINDU ME TUBA MFUMU, “Mwini yina kaka pesaka nsemo na Este ke pesa diaka nsemo na Weste, na ntangu ya nkokila. Yawu ke vwanda Nsemo na ntangu ya nkokila.”

<sup>222</sup> Yinki Yandi ke sala? Kaka yina Yandi tubaka na kapu 17 ya Luc. “Na ntangu ya nsuka, na ntangu Mwana ya muntu ke monisama mutindu mosi Yandi vwandaka na Este, Mwana mosi kaka ke pesa nsemo, Ngolo yina kaka, Mpeve-Santu yina kaka, Kima yina mosi kaka ke sala kima ya mutindu mosi. Yawu ke vwanda Nsemo na ntangu ya nsuka.”

<sup>223</sup> Mwini yina kaka salaka nzietelo; M-w-a-n-a yina mosi kaka salaka nzietelo; kwisaka kuna na Este, na Paul; kwendaka kuna na Allemagne, na Martin Luther; kwendaka diaka, na pull ya Yandi yina yankaka; mpe katukaka kuna tii na Angleterre, na John Wesley; kwendaka kuna na Océan Atlantique, na Etats-Unis, na ba Pentecotiste; mpe kuna ba Pentecotiste ke fwa malembe-malembe, mpe beto kele na Côte.

<sup>224</sup> Mosi na mosi na bawu, salaka denomination, kaka mutindu bawu salaka na mbatukulu, mpe salaka organisation yina Nzambi singaka. Ba Pentecotiste, mpe bawu nionso, salaka mutindu yina.

<sup>225</sup> Kasi Yandi tubaka, “Nsemo ke vwanda na ntangu ya nkokila. Kidimbu mosi ke basika na ntangu ya nkokila.” Beno luta na lweka na Yawu ve, bankundi ya munu. Beno luta na lweka na Yawu ve. Ntangu yayi, Mwana yina kaka ke pesa Nsemo ya mutindu mosi. M-w-i-n-i mosi kaka ke pesaka nsemo ya m-w-i-n-i ya mutindu mosi kaka. M-w-a-n-a mosi kaka ke pesaka Nsemo ya M-w-a-n-a ya mutindu mosi kaka.

226 Ntangu yayi, ke munu ve muntu ke tuba yawu. Muntu nionso awa, yina zaba ti Biblia ke tuba yawu, beno telemina maboko ya beno. [Dibuundu nionso me tuba, “Amen.”—Mu.] Ya kieleka.

227 Ntangu yayi, beno lunga, beno baka lukanu. Beno kwikila ti Mwana ya Nzambi, Yesu Klisto, keke, ya kufwa ve. Yandi ke zinga. Yandi ke na mutindu ya kukikulumusasa, ya kukikulumusasa. Yandi ke zingaka ntangu nionso mutindu yina. Mutindu ya kumata keke mutindu ya kukulumuka. Beno kukikulumusasa beno mosi, beno katula ntama mabanza na beno ya kizitu, mpe beno kwikila Mfumu Yesu. Beno tala kidimbu, na yawu beno kwikila Ndinga. Beno vutuka, O beno yina zimbanaka, na yina ya beno!

Beto kulumusa bayintu ya beno.

228 “Mpe kana bawu kwikila ve Ndinga ya kidimbu ya ntete, kidimbu ya diboko, mutindu yawu vwanaka na Moise, na yawu sala kidimbu ya zole. Mpamba ve, kana bawu kwikila ve kidimbu yayi, na yawu baka masa (masa ke talisa luzingu) yina ke na ocean to na nzadi, tiamuna yawu na zulu ya ntoto, yawu ke kuma menga.”

229 Tata ya Mazulu, ntangu yayi ntangu me luta mingi, kasi Nge silaka ti ke vwanda na Nsemo na nkokila. Bika ti Ndinga ya Nsangu ya mbote ya beto kukota na mudindu ya bantima ya bantu, mutindu bawu ke banza Yawu mpe ke longuka Yawu na nzila ya Ndinga.

230 Sakumuna kimvuka yayi, Mfumu. Sakumuna bantu yayi. Tala mutindu bawu me vwanda awa, na nzala, bamputu ya bana yina ke niokuka mpe ke mona mpasi ya mutindu na mutindu, mpe *yayi*, beto zaba ti Satana salaka yawu samu na kufwa meso ya bawu na kima yina na ntangu Yawu ke vwanda kuna. Bika ti, na nkokila yayi, na ngwisani, bawu kwikila Yesu Klisto, bawu kwikila nsilulu ya Yandi, ti Yandi me vumbuka na bafwa.

231 Nge tubaka, “Mwana ya muntu ke kwisa, na ntangu yina bawu ke banza ve.”

232 Kaka na ntangu yayi dibuundu keke na, mbongo mingi, yandi ke basisa ba millions ya ba dollars samu na lutungu ya bayinzo ya nene. Kulutila mbote, Tata, mu banza, bawu vutuka kuna na nsongi ya nzila, ke bula ngoma, na yimpu na maboko ya bawu, na drume ya nkulu na nsongi ya nzila mutindu Armée du Salut, na kisika kuvwanda na bayinzo ya nene ya madidi na nkokila yayi, ke meka na kumekula yinza, “Na luzingu ya busantu, mpe ke manga yina ke pesaka Ngolo.”

233 Pesa yawu, diaka, Mfumu, na nkokila yayi, Mfumu; mutindu Samson bokaka, “Mbala mosi diaka, Mfumu, mbala mosi diaka.” Bika yawu zabana ti Nge ke Klisto, Mwana ya Nzambi; mutindu mosi mazono, bubu yayi mpe kukonda nsuka. Mpe kukimonisa Nge mosi na kati ya beto, ti bawu lunga mona kidimbu, mbala yankaka bawu ke kwikila na Ndinga. Na yawu, mu ke lomba yayi na Nkumbu ya Yesu Klisto. Amen.



<sup>234</sup> Beto ke bokila ndonga ya bisambu, kaka na nswalu nionso. Mu ke mona ti beto lunga sukisa ntangu yayi. Kasi beto sala ndonga ya bisambu, kaka mwa ndonga ya fioti, na yawu beto ke banda diaka mbasi.

<sup>235</sup> Yandi kabulaka bakalati ya bisambu bubu yayi. Na yina, beto ke kabulaka bakalati ya bisambu konso kilumbu, na mutindu ti konso muntu lenda kuzwa ntangu ya mbote ya kuzwa yawu, na konso ntangu yina. Kutelema na ndonga ya bisambu, ke belusa beno ve. Muntu nionso kuzaba ti, na konso lukutakanu, bantu mingi ke beluka kulutila bayina ke telema awa, beno me mona, na ntangu nionso. Mpeve-Santu ke bisika nionso. Yandi ke sosa kaka bakwikidi, yawu yina kaka, Yandi ke na mfunu ya yawu.

<sup>236</sup> Bakalati ya bisambu yina bawu kabulaka ke banda na P, ya kufwanana na Paul. Wapi, beto sukisaka . . . Mbote, beto ke banda na mosi. Mosi, zole, tatu, yiya, tanu, sambanu, sambwadi, nana, yivwa, kumi, beno telema awa, kana beno zola. Bayina ke na bakalati ya bisambu ke banda na P, mutindu na Paul, mosi tii na kumi, beno telema na lweka yayi awa, kana beno lunga telema. Kana beno lunga telema ve, na yawu beto ke tuba na muntu yankaka na kusadisa beno. Kumi; mosi, zole, tatu, yiya, tanu, sambanu, sambwadi, nana . . . Mbote mingi, zole diaka. Nana, yivwa, kumi, mbote mingi. Kubanda na kumi tii na kumi na tanu, kumi tii na kumi na tanu, tanu diaka. Kumi na tanu tii na makumi zole, beno telema samu mu mona kana beno lunga telema; P, kumi na tanu tii na makumi zole. Makumi zole tii na makumi zole na tanu. Beto tala ntangu yayi, kisika beno kele. Ntangu yayi bayankaka nionso kuvwanda ya kieleka na luzitu, samu na mwa bamuniti fioti kaka. Yina lunga vwanda kalati ya bisambu P, mosi tii na makumi zole na tanu. Yawu yina ve? Makumi zole na tanu, kubanda na mosi tii na makumi zole na tanu.

<sup>237</sup> Ntangu yayi muntu nionso kuvwanda ya kieleka na luzitu. Beno pesa luzitu mingi na Nzambi, mpe na Nsangu. Beno pesa yawu na Nzambi, beno tala yawu muniti mosi mpe longuka yawu.

<sup>238</sup> Ntangu yayi mu banza ti bawu ke kubika bantu. Bayina kele ve . . . Beno tala kana bantu yina ke na bakalati ya bisambu, kele na ndonga, kana bawu kele; bawu tuba na munu na mwa bamuniti fioti, mpe na yawu bawu ke . . . na yawu bawu ke tala mbala yankaka ke na kifwa-makutu to muntu lunga telema ve.

<sup>239</sup> Mu zaba ve sika wapi bawu kele, bankundi ya munu, bayina ke na bakalati ya bisambu. Mwana-bakala ke kwisa kuna . . . (Nani kabulaka yawu? Nge, to Billy? Billy?) Mbote yandi ke kwisa kuna, mpe ke vukisa bakalati nionso kisika mosi, na ntwala na beno, mpe yandi ke pesa beno kalati ya bisambu; yandi ke kwisa kaka kuna, yandi ke tuba na beno nionso na kuvwanda,

mpe kupesa beno kalati ya bisambu. Beno me mona? Mu zaba ve sika wapi bawu kele. Mu ke meka na kutelemisa mwana yayi awa, beno me mona. Mpe, bayankaka, mu—mu zaba diambu na yandi ve, mu—mu lunga zaba yawu ve. Mu banza ti Nzambi ke sala yawu na mutindu Yandi me zola.

<sup>240</sup> Ntangu yayi, beno bayankaka, bayina ke na bakalati ya bisambu ve. Beno telemisa maboko ya beno, mpe tuba, “Mu ke na kalati ya bisambu ve, kasi mu ke mbevo.” Telemisa diboko ya nge, konso kisika yina na kati ya yinzo yayi. Mu ke tala ve kisika beno kele, beno telemisa maboko ya beno. . . Mbote, bantu ke mingi diaka ve awa, na ntangu yayi. Mbote, na kulanda yina, mbingi yawu ke baka ntangu ya yinda ve na ndonga ya bisambu. Bantu makumi zole ke na kati awa, na nganda ya bantu yayi me telema awa, yina ke bambevo.

<sup>241</sup> Yina ke mbote. Mu ke na kiese na kumona ti beno ke kwikila mutindu yina. Beno ke na lukwikilu ya mingi kulutila mutindu mu banzaka, mbala yankaka. Beno me mona? Beno me mona? Kana beno me ndima kubeluka ya beno, beno losa ntama bakalati ya beno, Nzambi sakumuna beno. Yina ke lukwikilu ya kieleka. Muntu mosi ve me tetika maboko na zulu ya beno; beno me tetika maboko na zulu ya Klisto.

<sup>242</sup> Beno yayi kele awa na nkokila yayi, mpe beno yina ke vwanda ve ndonga ya bisambu, beno kwikila disolo yayi. Mutindu kento yina simbaka nsongi ya lele ya Yandi, mpe Yandi balukaka mpe zabaka kento yina simbaka Yandi, bantu yikwa ke bambuka disolo yina? Ya kieleka, beno zaba yawu.

<sup>243</sup> Ntangu yayi beno ke kwikila ti, Yandi yina, Biblia ke tubila na ba Hebreux 4, ti, “Yandi ke Mbuta ya Baganga-Nzambi ya, kaka na ntangu yayi, yina lunga simbama na bansatu ya bimbevo ya beto?” [Dibuundu me tuba, “Amen.”—Mu.] Mbote, kana Yandi ke mutindu mosi mazono, bubu yayi, mpe kukonda nsuka, Yandi lunga sala ve mutindu mosi? [“Amen.”] Yandi me salaka yawu ntete ve, awa, nkokila na manima ya nkokila? [“Amen.”] Yikwa me vwandaka ntete na balukutakanu yankaka mpe monaka Yandi ke sala mutindu yina? Beno telemisa. . . [“Amen.”] Ya kieleka. Beno me mona? Na yinza ya muvimba! Yandi zaba yawu, Yandi zaba nionso samu na beno.

<sup>244</sup> Ntangu yayi beno ke mona yina mu ke meka na kusala? Yikwa ke bakula yina mu zola ti beno sala? Beno me mona? Mu zola ti, kukondwa muntu mosi kutetika maboko na zulu na beno, mu zola ti, mutindu bantu ya kieleka ya Nzambi, beno tuba, “Yesu Klisto, mu ke kwikila Nge. Ntangu yayi mu ke kwikila Nge mutindu Munganga ya munu. Ntangu yayi mu ke kwikila Nge mutindu Mvulusi ya munu. Mu ke kwikila yawu na ntima ya munu ya muvimba ti, kosalu na yandi me salama.” Na yawu beno simba nsilulu yina, beno kwikama na kundima ya beno mpe beno kwenda na ntuala. Beno tala yina ke salama. Beno me mona?

Beno tala yina ke salama. Beno me mona? Yawu yina mu zola ti beno sala, beno kwikila na bantima ya beno ya muvimba.

<sup>245</sup> Yinki beno ke tuba? [Muntu mosi me tuba, “Yiya na kumi na yivwa.”—Mu.] Numero ya yiya, kalati ya bisambu numero ya yiya mpe numero ya kumi na yivwa, kele ve. Kalati ya bisambu numero ya yiya. Beno tala muntu mosi; beno tala bakalati ya bantu yina ke pene-pene ya beno. Kalati ya bisambu numero ya yiya na numero ya kumi na yivwa. Mbote, beno vingila, mwa ntangu fioti. Beno me mona, kana mu bokila yandi ve, na yawu beno losa disu na yawu, beno me mona. Yinki beno ke tuba? Yinki beno ke tuba? [“Yiya.”] Beno me zwa yiya? Wapi kumi- . . . Kumi na yivwa ntete ve. Yinki beno ke tuba? [“Na yiya.”] Kalati ya bisambu numero yiya me kwisa ntete ve, to kumi na yivwa. Kana muntu mosi ke na bakalati yayi, yandi lenda kwisa na ndonga ya bisambu. To, beno tala, beno mona, yawu lunga vwanda . . . kele na . . . Bébé yayi ke na kalati yina ve? Beno tala, kele ve . . . Yawu ke numero yina ve. Mama *yayi* awa ke na kalati ve, yayi me vwanda na kiti ya bambevo yayi? Beno tala numero na yandi. Yawu yina—yawu yina numero na yandi? Mama mosi na zulu ya mbeto ya bambevo, huh? Bawu me zwa yawu. Bawu, bakalati nionso kele awa ntangu yayi. Yinga. Mbote mingi. Ntangu yayi—ntangu yayi, bantu yina nionso ke na bakalati, beno simba yawu mbote-mbote. Beto ke sadisa beno, na lemvo ya Nzambi.

<sup>246</sup> Ntangu yayi, bankundi ya munu, yayi ke nkokila na beto ya nsuka, samu mbasi Lumingu yawu ke vwanda na manima ya midi, beto vwanda pima. Ntangu yayi beno baka kukondwa lukwikilu nionso beno ke na yawu mpe konso—konso dibanza ya yimbi, mpe beno losa yawu na ntoto, mpe beno niata yawu, na mutindu nionso. Beno tuba, “Mfumu Yesu, mu ke kwikila Nge.” Yikwa ke sala yawu? [Dibuundu me tuba, “Amen.”—Mu.] Matondo na nge. Nzambi sakumuna beno.

<sup>247</sup> Ntangu yayi muntu mosi kukwenda ve. Beno vwanda kaka na pima, mpe beno kwikila. Beno tala na lweka yayi, mpe beno tala ntangu yayi.

<sup>248</sup> Nzambi ke kukimonisaka ntangu nionso na nkadulu na yandi ya kuzaba, lunga mona na ntwala yina vwandaka, mpe kutuba yina vwandaka, yina kele, to yina ke vwanda. Beto zaba yawu. Kele na mutindu yina bawu zabaka ba profete. Kele mutindu yina bawu zabaka Yesu mutindu Mesiya. Mpe Yandi ke Mesiya yina kaka bubu yayi mutindu Yandi vwandaka ntete, katula kaka nzutu ya kimuntu awa na zulu ya ntoto. Yandi me tinda Mpeve ya Yandi samu na kusadila nzutu ya beno, mpe nzutu ya munu. Ntangu yayi, beno lunga vwanda na kiyeka ya kusala yawu ve. Beto zaba, na kati ya Masonuku ti, kele kaka na mosi na konso nsungi. Kasi, beno me mona, kasi beno kwikila yawu, mpe kele na bima yankaka yina beno lunga sala, konso muntu.

249 Yinki ke vwanda kana musapi na munu kutuba ti, samu mu ke disu ya nge ve, mu ke vwanda diaka ve disu ya nge? Yinki ke vwanda kana diboko yayi kutuba, “Mu ke telema diaka ve, samu mu ke disu ve, to dikutu ve, mu ke vwanda diaka ve diboko?” Mpamba ve, yawu ke sala ti nzutu ya munu kusala diaka ve.

Beno vwanda kaka kisika Nzambi tulaka beno.

250 Na bambala mingi mu sepelaka na Oral Roberts, Billy Graham, Tommy Osborn!

251 Bantu ya mutindu yina ke kwenda kuna mpe ke tuba, “Nkembo na Nzambi! Beno kwikila yawu!” Lukwikilu ya yimbwa. Bawu ke katuka kuna, bawu ke kwenda kuna na mawete mpe ya kukubama.

252 Billy Graham telemaka na nsangu mosi, mpe tubaka na bantu na mwa bamuniti fioti, yandi tubaka, “Beno baka lukanu ya beno; beno kwisa na autel.” Yandi telema kaka kuna, mpe ke sala kima mosi diaka ve.

Yandi tubaka, “Kasi samu na yinki nge ke salaka mutindu yina, Billy?”

253 Yandi tubaka, “Nsangu ya munu longamaka. Yawu me katuka na Nzambi.” Ya kieleka.

254 Yandi ke na dibuundu yina ya Sodome, kaka yina lendaka vwanda. Nkumbu ya yandi ke suka na h-a-m mutindu Abraham, bisono sambanu; Abraham vwandaka sambwadi. Beno me mona munati-nsangu ya dibuundu yina, kuna na Babylone? Ya kieleka. Kele na muntu mosi ve na yinsi ya muvimba yina me simba mbote-mbote nsangu yina ya kubalula ntima, mutindu Billy Graham. Yandi me telema kuna. Yandi ke katuka kuna, mpe ke kwenda dia T-bone steak d’aloyau mpe ke mata na mbeto, mpe ke nwa miliki ya malt. Yina ke mbote.

255 Mpe yinki ntangu beno ke telema samu na kunwanisa bampeve ya yimbi! Na ntangu mosi na Long Beach, Mpangi Jack na munu. . . Tata ya beno vwandaka kuna.

256 Mpe kuna vwandaka Tata Fuller, Charles Fuller, mpangi mosi ya mbote, yandi telemaka mpe longaka kuna. Bantu mafunda zole to tatu vwanda kuna na manima ya midi yina. Beto vwandaka kuna mpe waka lukutakanu ya yandi. Mu futilaka yinzo yina, na manima ya yandi. Mpe yandi telemaka kuna mpe tubaka bandinga ya kitoko. Mpe yandi tubaka, “Nani awa zola ndima Klisto?” Bantu zole to tatu kwisaka kuna samu na kutambika ba bébé ya bawu. Kento mosi tubaka ti yandi zolaka ndima Yawu. Diacre mosi kwisaka mpe salaka mwa kisambu mosi ya fioti, mosi ya ba-diacre, yandi vutukaka mpe vwandaka. Yandi pesaka mbote na bantu, balukaka mpe basikaka. Yawu vwandaka kimvuka ya bantu me longukaka mingi, yina ke lwataka bilele ya kitoko mingi, bawu bandaka na kubasika.

257 Tala ntangu yayi kimvuka na munu kotaka, na bilele ya maboko ya yinda, na bakiti ya bambevo, bifwa-meso, bikata, bantu ke tambulaka na mpasi, bakonzo. Na ntangu lukwikilu na beno ke kutana na kima ya mutindu yina!

258 Ntangu yayi, yinki me tuba ti Klisto kele? Mpe ntangu yayi mimpani me vwanda pene-pene, bawu zola mona kifu mosi, beno me mona, ke meka kaka na kumona kifu mosi.

259 Beno bambuka ti, ntama mingi ve awa na Toronto, beto telemaka kuna samu na kulonga, mpe samu na kusambila samu na bambevo. Mu vwandaka wa ntangu nionso mpeve mosi ya ngitukulu; yawu telemaka na diboko na munu ya kikento. Mu vwandaka tala yawu na bukebi nionso. Bakala mosi vwandaka kuna, kimvuka ya bantu tindaka yandi kuna samu na kuloka munu. Yandi lungaka kwenda camp ya basoda mpe kusala ti basoda kutambula na mabolongo mpe kuboka mutindu bayimbwa, mpe nionso yina; kuloka. Mu waka mpeve yina ya yimbi. Mu zabaka ve sika wapi yawu katukaka. Mu talaka na bukebi nionso. Mu monaka kivudi yina ya ndombe. Mu vingilaka mwa ntangu fioti. Mu tubaka, “Nge mwana ya Satana, samu na yinki diabulu me fwa mabanza na nge mutindu yina? Samu nge me kwisa samu na kuyala na zulu ya Nzambi, samu na kumeka Mpeve ya Nzambi, ba ke zangula nge na kubasika awa.” Nzutu ya yandi ninganaka diaka ve kuna na kiti ya yandi mpe yandi kumaka kaka kikata. Beno me mona?

260 Beto ke sakanaka ve na yinzo-Nzambi. Yikwa vwandaka ntete na balukutakanu mpe me monaka bima ya mutindu yayi ke salama, mpe beno zaba ti bima yayi salamaka? Ya kieleka. Yina ke mbote. Beno bambuka ti, beno vwanda—vwanda na luzitu.

Ntangu yayi awa, mu banza ti, yayi ke muntu ya ntete. Ya kieleka?

261 Ntangu yayi, beno me mona, mu me longaka, mpe ya kieleka mu tubaka na beno yina mu banza ke salama na bilumbu yayi. Ntangu yayi yina ke kidimbu, kana yawu salama. Yawu yina vwandaka kidimbu, na yawu beno kwikila Ndinga yina ke fidisa kidimbu. Beno me mona?

262 Kento mosi kele awa na ntangu yayi. Ya kieleka, samu na beno me kwisa na mbala ya ntete, tala awa na Santu Jean kapu 4, sika wapi Mfumu ya beto Yesu tubaka na kento yina vwandaka na dibulu. Bawu me kutanaka ata fioti ve na luzingu ya bawu, mpe Yandi tubaka na kento yinki vwandaka mpasi ya yandi. Mpe yandi zabaka ti yina vwandaka Mesiya. Beno zaba disolo? Yawu yayi diaka, bakala mosi na kento mosi kutanaka. Ntangu yayi yandi ke kento yina ve, mpe mu ke Muntu yina ve, kasi yawu ke kaka Nzambi mosi yina. Beno me mona? Ntangu yayi, Yesu tubaka ti, “Beno mpe ke sala bisalu mu ke sala,” Santu Jean 14:12.

263 Ntangu yayi, mama, mu zaba nge ve, mu zaba ve kikuma nge me telema awa. Yawu lunga vwanda bampasi ya dibuta. Yawu lunga vwanda samu na muntu yankaka. Mbala yankaka nge ke mbevo. Mbala yankaka yawu ke . . . Mbala yankaka nge me telema kuna, kaka samu na kusikimisa kima mosi. Kana yawu ke mutindu yina, tala kaka yina ke salama. Beno me mona? Mbala yankaka beno ke mekula kima mosi. Konso kima yina yawu kele, mu zaba ve . . . Beno lunga vwanda mukwikidi ya kieleka. Mu zaba yawu ve, kasi Nzambi zaba yawu. Kasi beno ke zaba kana Yandi me tuba na beno kieleka to ve, mutindu yina ve? Kana yawu ke kieleka, beno ke zaba yawu.

264 Ntangu yayi, beno me mona, yawu yina lukwikilu ya beno fwana sala. Beno zola kwisa awa? Ntangu yayi kana muntu mosi ke kwikila ti yawu ke luvunu, yandi kwisa awa mpe baka mbevo yayi awa, yandi kwisa baka bantu yayi nionso awa. Kana beno ke sala yawu ve, na yawu beno bedisa munu ve. Beno me mona?

265 Beno tala awa ntangu yayi, mpangi-kento, kaka na muniti mosi. Ntangu yayi mu ke na dibanza mosi ve, mu zaba kima mosi ve samu na nge. Nge ke kaka kento mosi me telema kuna.

266 Ntangu yayi kana Mfumu Yesu Klisto, Mwana ya Nzambi, Yina me ndimisama na Biblia, silaka ti Yandi ke vutuka na bilumbu ya nsuka mpe kukimonisa Yandi mosi na muvimba ya Mpeve ya Yandi . . .

267 Kaka mutindu Dibuundu yina me yela; kaka mutindu yawu ke salamaka na muntu, yawu ke banda na makulu, yawu kwisa na mipende, yawu mata na yintu, mpe yintu ke mfumu ya nzutu. Mpe Nzutu yelaka, kubanda Dibuundu ya ntete, mpe bandaka na kuyela, na yayi, na ba reforme, yelaka, tii na ntangu yayi . . . Yawu lutaka na lunungu, busantu, mbotika ya Mpeve-Santu. Ntangu yayi yawu ke Yintu, Klisto, ke kwisa na Nzutu, Nzutu ya Klisto. Yandi ke Mosi Yina zaba. Diboko na munu lunga sala ve, kana yintu na munu me tuma yawu ve. Kasi Yandi ke Mosi Yina zaba, kikuma yawu yina Yandi ke Ndinga.

268 Mu ke Ndinga ve. Mu ke muntu. Kasi, beno me mona, Yandi ke sadilaka nzutu yayi. Samu, Yandi fwaka samu na kusantisa nzutu yayi, samu Yandi sadila yawu, mpe kupesa dikabu mosi. Kaka kukatuka na nzila, na yawu Mpeve-Santu ke sala kusalu.

269 Mpamba ve ti, beno ke kwikila yawu, kana Yandi swasikisa to tuba na beno yina beno salaka, mpe kikuma beno me kwisila awa, to kima mosi me tadila beno. Mpe bantu nionso ke kwikila mutindu yina? [Dibuundu me tuba, "Amen."—Mu.] Bika Mfumu Nzambi kupesa yawu.

270 Ntangu yayi mu ke baka konso mpeve, na kati awa, na nsi ya luyalu na munu, samu na nkembo na Nzambi. Beno vwanda pima ntangu yayi. Beto baluka na lweka ve.

271 Beno tala awa, kaka na mwa ntangu fioti. "Beno tala munu," mutindu Pierre na Jean tubaka, na ntangu bawu vwandaka luta

na mwelo. Na mutindu yankaka, beno wa mbote-mbote yina mu ke tuba. Beno me mona?

Yesu yufulaka kento yina mwa bakiuvu. “Natila Munu masa.”

272 Beno me mona, bawu longaka munu, kima ya mutindu mosi. Tata me tinda munu awa na—na Baton Rouge. Mu kele awa.

273 Tata tubaka ti Yandi vwandaka na nsatu ya kukwenda na Samarie. Yandi vwandaka kuna. Kento mosi vwandaka muntu ya ntete na kukwisa na Yandi. Yandi salaka kidimbu mosi na ntuala ya kento yina, mpe mbanza ya muvimba balulaka ntima. Yinki luswaswanu yawu. . .

274 Beno banza ti, kana Yandi sala kima ya mutindu mosi, na nkokila yayi, beno ke banza ti bantu nionso ya Baton Rouge ke balula bantima? Mu tula ntembe, beno ve? Ya kieleka. Kasi beto ke na bilumbu ya nsuka, na ntangu mpeve ya yimbi kele me kuma mingi kulutila yina beto zaba.

275 Mavimpi ya nge ntangu yayi. Nge kele awa samu ba sambidila samu na nge. Ya kieleka. Nge ke na mpasi ya laka. Kana ya kieleka, telemisa diboko ya nge. Yina kaka ve, kasi nge ke sambidila samu na muntu yankaka. Ya ke mwana, mpe mwana yina ke na mpasi ya laka. Mpe yina ket ambula mbote ve na laka ya mwana, yandi ke kuvimba na laka. Nge ke kwikila ti Nzambi ke belusa yandi, diaka? Muswale yina ke na diboko ya nge, yina nge me zangula na Nzambi, mutindu kimbangi. . . Kutula ntembe ve na ntangu yayi. Kwenda mpe tetika muswale na zulu ya mwana. Kutula ntembe ve, na ntima ya nge ya muvimba. Nzambi ke belusa beno zole mpe beno ke kuma mbote. [Mpangi-kento me tuba, “Yandi baka lukumu! Alleluia!”—Mu.] Nge ke kwikila yawu? [“Yesu! Matondo na Nge, Yesu!”] Na yawu kwenda, mpe Mfumu kuvwanda na nge. [“Nkembo na Nzambi! Alleluia!”]

Kiese na kumona nge? Beto ke banzenza, diaka.

276 Beno ke kwikila? [Dibuundu me tuba, Amen.]—Mu.] Yina ke kidimbu. Ntangu yayi Ndinga, kele, “Beno vutuka na Ndinga!”

277 Mu zaba nge ve; kasi Yandi zaba nge. Kana Yandi tuba na munu kima mosi samu na nge, na yawu beno ke kwikila ti Ndinga yina mu me longa ke ndimisama? Yina ke—yina ke kundimisama na Yawu. Beno me mona? Mu tubaka ti Yandi salaka yawu; yina ke kupesa profesi. Ntangu yayi kana profesi kusalama, na yawu Yandi tubaka, “Beno wa yawu.”

278 Nge ke na mpasi ya kidi-kidi na yintu ya nge, kidi-kidi. Mpe nge ke kivimbu, mpe kivimbu ke na dikulu ya nge. Ya kieleka, mutindu yina ve? [Mpangi-kento me tuba, “Yinga.”—Mu.] Ntangu yayi nge ke kwikila? [“Yinga, tata.”] Na yawu kwenda, mpe kwikila. Mpe, kaka mutindu nge me kwikila, yawu ke salamina nge mutindu yina.

279 Kiese na kumona nge? Mu zaba nge ve, kasi Nzambi zaba nge. Nge ke kwikila ti Nzambi lunga tuba na munu bampasi ya nge? Tala munu. Nge ke na bampasi. Kasi nge me telema awa samu na muntu yankaka, mpe yandi ke muntu yina yelana na nge. Yandi ke mpangi-kento. Ya kieleka. Ntangu yayi nge ke kwikila ti Nzambi lunga tuba na munu yina ke tambula mbote ve na mpangi na nge yina ya kento? Nge ke ndima yawu? Yandi ke na mpasi ya ntima. Ya kieleka. Nge ke kwikila ti yandi ke beluka ntangu yayi? Na yawu, bika yawu salamina nge, na mutindu ya lukwikilu ya nge.

280 Kwisa, mama. Kiese na kumona nge? Kana Nzambi lunga tuba na munu yina ke mpasi ya nge, to yina nge salaka, to kima mosi, nge ke kwikila? Nge zaba ti mu ke . . . Mu—mu—mu zaba nge ve. Yina lunga vwanda nkadulu ya Yandi ke kukimonisa Yawu mosi na munu, na kulandaka Ndinga yina Yandi silaka. [Mpangi-kento me tuba, “Mu ke kwikila yawu kaka.”—Mu.] Nge ke kwikila yawu? [“Yinga. Amen.”]

281 Nge mpe, nge ke na bampasi yina kento ya bamvula na nge lunga vwanda na yawu, kasi dibanza ya nge ya ntete kele samu na muntu yankaka. Nsatu ya nge na Nzambi; nge ke sosa Nzambi samu na nge mosi ve, kasi samu na muntu yankaka, yandi ke bakala. Yandi ke bakala ya nge. Mpe yandi ke na mpasi ya ntima. Nge ke kwikila ti Yandi ke . . . Nzambi ke belusa yandi? Kwenda, mpe kwikila yawu. Mpe, yawu salamina nge, na mutindu ya lukwikilu ya nge.

282 Ntangu yayi, beno tala, dilongi nionso, samu na ngunga yina mu me longi. Yawu, yawu vwandaka, bantu tatu to yiya me luta awa, kasi awa mu lunga telema diaka ve. Beno me mona? Tala, bantu nionso awa ke monana mutindu miliki, na bisika nionso awa. Beno me mona? Yesu tubaka, “Ngolo mosi me basika na Munu.” Mpe kana kento mosi, na ntangu yandi simbaka lele ya Yandi, ngolo mosi basikaka na Yandi, mpe Yandi Mwana ya Nzambi, yinki ke salama na munu, nsumuki yina me vuluka na lemvo ya Yandi?

283 Yandi tubaka, “Beno mpe ke sala bisalu yina mu ke sala. Beno ke sala ya *mingi* kulutila yayi.” Mu zaba Ntinu Jacques ke tuba, “ya nene mingi.” Kasi kana beno baka lubangulu ya kisina, yawu ke tuba, “Beno ke sala ya *mingi* kulutila yayi.” Muntu mosi ve lunga sala ya nene mingi. Yandi vumbulaka bamvumbi, mpe Yandi telemisaka yinza, mpe salaka bima nionso. Kasi Yandi tubaka, “Beno ke sala ya *mingi*, samu Mu ke kwenda na Tata.”

284 “Yinza ke mona Munu ve; kasi beno ke mona Munu, samu Mu. . .” Tala, “Munu,” Munu—Munu ke kyingilu kimuntu. “Mu ke vwanda na beno, ata mpe na kati na beno.” Mpamba ve, yawu ke muntu ve. Yawu ke Klisto.

285 Mu ke tuba mutindu yina, samu na kukiningisa munu mosi, mutindu ya kuvutukisa munu mosi. Beto ke kwenda ntama mingi



tii kuna na ntangu mosi . . . Yawu kele ve na ntangu beto ke *kuna* na zulu, to na nsi *awa*; kasi na kati-kati ya nionso zole. Yikwa ke bakula yawu? Mu zaba ti beno—beno ke bakula. Munu, mpe.

<sup>286</sup> Beno zaba ve ti bamuyimbi-mikunga mpe ba profete ke vwandaka ntangu nionso bantu ya kidi-kidi? Yikwa zaba yawu?

<sup>287</sup> Yikwa me waka ntete William Cowper, nsoniki ya nene ya Kingelesi? Beno zaba, yandi sonikaka, “Kele na kiziba mosi ya kifuluka na Menga, yina basikaka na misisa ya Emmanuel.” Na manima kusonika mukunga yina, beno zaba yina kuminaka yandi? Mu telemaka pene-pene ya ntoni ya yandi ntama mingi ve. Yandi mekaka na kudifwa, mpe dindaka na nzadi.

<sup>288</sup> Yikwa me waka ntete Stephen Foster, yina pesaka na Amerique bamikunga ya yandi ya kitoko mingi? Yandi vwandaka na yawu na yintu kasi na ntima ve. Konso ntangu lutwadusu ya kimpeve lungaka bula yandi, yandi lungaka sonika mukunga. Kasi na ntangu lutwadusu ya kimpeve bikaka yandi, yandi zabaka diaka ve yinki kusala na yandi mosi, mpe yandi zimbanaka. Yandi—yandi—yandi kumaka kinwa-malafu. Mpe na nsuka na ntangu yandi basikaka na lutwadusu ya kimpeve, yandi bokilaka musadi mosi, mpe bakaka lutebu mosi mpe kudifwaka. Ya kieleka.

<sup>289</sup> Beno tala Elie, profete. Yandi mataka kuna mpe kitisaka tiya na zulu; kitisaka mvula na kilumbu ya ntete; mpe kangaka mazulu mpe salaka nionso yina. Mpe na ntangu lutwadusu ya kimpeve bikaka yandi, yandi kwendaka na ntoto ya kuyuma mpe zolaka kufwa. Mpe Nzambi monaka yandi, na manima bilumbu makumi yiya, ya kubumbana na kati ya ditadi. Ya kieleka?

<sup>290</sup> Beno tala Jonas, profete. Na manima kulonga nsangu ya yandi, yandi mataka kuna mpe vwandaka na zulu ya mongo, mpe lombaka na Nzambi ti yandi fwa. Uh-huh. “Bika musadi ya Nge kukwenda na ngemba.”

<sup>291</sup> Bantu ke bakulaka yawu ve. Ve, ve, beno ke bakula yawu ve. Munu mpe ke tendula yawu ve, ata muntu yankaka ve. Beno lunga tendula Nzambi ve. Ba ke zabaka Nzambi ve na mayele ya kimuntu. Ba ke zabaka Nzambi na lukwikilu. Beto ke kwikilaka na Yandi. Yinki mutindu beno lunga tendula yawu? Yinki mutindu yawu ke vwanda diaka, lukwikilu? Beto ke zabaka Nzambi na lukwikilu.

<sup>292</sup> Dibundu ke bakula ata fioti ve kuniokuka nionso mpe kulemba nionso, mpe bampasi mpe kumekama nionso, yina mekaka na kunata Yawu, Nsangu. Yandi zaba yawu. Musendo ya munu ke katuka na bantu ve.

<sup>293</sup> Tala awa, mama. Yinga, na nswalu nionso. Kento yina ke na kivudi ya lufwa. Kana Nzambi kukwisa na yandi ve ntangu yayi, mu ke mona . . . Beno ke mona ve kima yina ya ndombe na zulu na yandi? Yandi ke fwa, ya kieleka. Awa ntama mingi ve, bawu bakaka kizizi ya kima ya mutindu yina, mpe mu ke na yawu

na yinzo. Yandi ke kivudi mosi ya ndombe pene-pene ya yandi. Yandi me fikama na kivudi mosi ya ndombe.

294 Bawu salaka mama yayi ya leke lipaso. Mpe lipase yango, vwandaka samu na cancer. Mpe yandi ke na bampasi, bampasi ya-ya, mbote, kaka minianga. Kima mosi kaka, nge ke ya kulemba mingi ti nge lunga telema ve. Kima yankaka, kisubidi ya nge ke basisa tufina. Ntangu yayi, nge ke mona ti mu zola meka ve na kusala kinganga-nkisi. Beno me mona? Ya kieleka. Kasi, mama, munganga mekaka. Mu ke ndima ti yina ke kisalu ya yandi. Kasi, yandi vwandaka nkisi, kasi Nzambi ke yina ke belusaka. Nge ke fwa mutindu yina. Yandi me sala nionso yina yandi lunga sala. Nge ke kwikila? [Mpangi-kento me tuba, “Yinga.”—Mu.] Beno kwisa awa, samu na muniti.

295 Na nzila ya lutumu yina pesaka munu Nzambi ya Ngolo nionso, yina ndimisamaka na munu na Wanzio, yina kele awa na mutindu ya Dikunzi ya Tiya, mu ke bedisa diabulu yayi yina zola baka luzingu ya kento yayi. Na Nkumbu ya Yesu Klisto. Amen.

Kwenda, kwikila ntangu yayi. Kwikila, na yina nionso kele ya nge.

296 Nge ke na mpasi yina ke fwa bantu mingi kulutila kima yankaka nionso, mpasi ya ntima. Bawu ke tubaka ti ya ke kimbevo ya yimbi kulutila bimbevo nionso, kasi ya ke mutindu yina ve, tata. Disumu ke kimbevo ya kulutila yimbi. . . kimbevo. Nge ke kwikila ti Yandi ke na kiyeka ya kubelusa ntima yina mpe nge kuma mbote? [Mpangi-bakala me tuba, “Mu zaba ti Yandi lunga sala yawu.”—Mu.] Na yawu kwenda, mpe kwikila yawu. Nzambi sakumuna nge.

297 Nge ke kwikila ti Nzambi lunga belusa mukongo na nge mpe nge kuma mbote? Nge ke kwikila yawu na ntima ya nge ya muvimba? Kwenda, kwikila yawu, mpangi-kento. Tala yina ke salama na nge, nge ke kuma mbote.

298 Arthrite mpe mpasi ya ntima. Kasi nge ke kwikila ti Nzambi lunga belusa nge? [Mpangi-kento me tuba, “Mu ke kwikila yawu.”—Mu.] Na ntima ya nge ya muvimba? [“Yinga, tata.”] Nge ke ndima yawu? [“Yinga, tata.”] Yawu salamina nge, na mutindu ya lukwikilu na nge. Kwenda ntangu yayi, mpe kwikila yawu na ntima ya nge ya muvimba, mpe Nzambi ke belusa nge.

299 Nge ke diaka na mpasi ya mukongo. Nge ke kwikila ti Yesu Klisto lunga belusa nge? [Mpangi-kento me tuba, “Yinga, tata.”—Mu.] Kwenda ntangu yayi, mpe kwikila yawu na ntima ya nge ya muvimba. Beno me mona, mu lunga belusa nge ve.

300 Prostate, kidi-kidi, arthrite diaka. Nge ke kwikila ti Nzambi lunga belusa nge, samu nge kuma mbote? Nge ke ndima yawu? Kwenda, mpe kwikila yawu, diaka.

301 Nge ke na kosu-kosu, yawu yina ke sala ti nge lala mpongi ve. Kasi Nzambi ke belusaka asthma. Nge ke kwikila yawu?

[Mpangi-bakala me tuba, “Yinga, tata.”—Mu.] Nge ke kwikila ti Yandi ke belusa nge na ntangu yayi? [“Yinga, tata.”] Nzambi sakumuna nge. Matondo na nge, samu na lukwikilu ya nge.

<sup>302</sup> Yinki ke vwanda kana mu tuba na nge ata ndinga mosi ve, mpe mu tetika kaka maboko ya munu na zulu ya nge, nge ke kwikila? [Mpangi-bakala me tuba, “Yinga.”—Mu.] Kwisa awa. Mu ke tetika maboko ya munu na zulu na nge, na Nkumbu ya Yesu Klisto, mpe bika ti arthritis kubika nge. Yawu me bika nge.

<sup>303</sup> Kwisa. Kwisa, mpangi-kento. Nge ke kwikila? [Mpangi-kento me tuba, “Yinga, tata. Mfumu me belusa munu.”—Mu.] Mbote, yina ke mbote mingi. [“Alleluia!”] Na yawu kwenda baka madia ya nge ya nkokila, mpe estomac ya nge ke beluka. [“Alleluia! Alleluia! Alleluia!”]

<sup>304</sup> Bampasi ya mukongo, ke yangisa beno kubanda ntama. Kwenda, mpe kwikila ti nge ke . . . Kwenda, mpe kwikila ti nge ke kuma mbote, mpe Nzambi ke sala yawu samu na nge. [Mpangi-bakala me tuba, “Nzambi me sala yawu. Amen.”—Mu.] Amen. Yina ke mbote. [“Mfumu kubaka lukumu.”] Mfumu sakumuna nge, mpangi-bakala. Amen.

<sup>305</sup> Diabete ke kima mosi ve, samu Nzambi kubelusa yawu. Yandi lunga belusa yawu. Nge ke kwikila yawu? [Mpangi-kento me tuba, “Mu ke kwikila yawu.”—Mu.] Mbote mingi. Ndima yawu, mpe kwenda kwikila na Yandi na ntima ya nge ya muvimba ntangu yayi.

<sup>306</sup> Nge ke na yawu diaka na menga ya nge. Nge ke kwikila ti Nzambi ke belusa nge? Kwenda, mpe kwikila yawu na ntima ya nge ya muvimba, mpe beluka.

<sup>307</sup> Nge ke kwikila ti Yandi belusaka nge na ntangu kima yina bulaka nge? Yandi salaka yawu.

<sup>308</sup> Kimbevo ya bakento. Mpasi ya ntima. Nge ke kwikila yawu? [Mpangi-kento me tuba, “Mu ke kwikila yawu.”—Mu.] Kwenda, beluka—beluka na Nkumbu ya Yesu.

<sup>309</sup> Nge ke kwikila ti Nzambi ke belusa mukongo ya nge, ti ba rein ya nge ke . . . Nzambi sakumuna nge! Kwenda kaka na ntuala.

Mu ke belusa muntu ve. Mu lunga belusa muntu ve. Mu ke belusaka bantu ve.

<sup>310</sup> Yinki beno banzaka na ntangu Yandi tubaka samu na mukongo ya yandi, nge ke kwikila ti ya nge mpe, me beluka? Mbote mingi, kwenda kaka, mpe kwikila yawu, mutindu . . . Kwenda kaka mpe kwikila yawu, na ntima ya nge ya muvimba.

<sup>311</sup> Ya nge diaka, nge ke kwikila ti Nzambi ke belusa nge? Kwenda, mpe kwikila yawu, na ntima ya nge ya muvimba. Nzambi ke pesa yawu kana nge . . . Kwikila yawu, kaka.

312 Nge ke kwikila ti Nzambi ke belusa nge, diaka? [Mpangi-kento me tuba, “Mfumumu kubaka lukumu! Ya kieleka mu ke kwikila yawu.”—Mu.] Mbote mingi. Nzambi sakumuna nge. Kwenda na ntwala mpe kwikila yawu na ntima ya nge ya muvimba.

313 Kwisa, tata. Ditonzi mosi ya mpembe me bwa. Yina ke kidimbu ya diabete. [Mpangi-bakala me tuba, “Diabete.”—Mu.] Nge ke kwikila ti Yandi ke belusa nge? Beto kwenda na Calvaire samu na kubaka menga na ntangu yayi. Na lukwikilu, na Nkumbu ya Yesu Klisto, bika yandi beluka. Amen. Nzambi sakumuna nge, mpangi-bakala. Kwikila na ntima ya nge ya muvimba. Nge ke kwikila? [“Ya kieleka.”]

314 Ntangu yayi yinki ke diambu ya beno bayankaka na kati ya yinzo yayi? Beno ke kwikila na bantima ya beno ya muvimba, ti Yesu Klisto ke mutindu mosi mazono, bubu yayi, mpe kukonda nsuka? Beno ke kwikila yawu? [Dibuundu me tuba, “Amen.”—Mu.]

315 Yinki ke diambu ya beno na lweka yayi? Mama yayi ya leke me vwanda kuna, ke tala munu, yandi ke na kimbevo ya bakento, nge ke kwikila ti Nzambi ke belusa nge? Yina me lwata kazaka ya bleu. Mbote mingi. Kwikila ntangu yayi, ti Yesu Klisto ke belusa nge. Ya ke mpasi ve.

316 Mama yina me vwanda na manima ya nge, na bansuki ya ndombe. Yandi me tuba, “Matondo na Nge, Mfumumu.” Kima mosi me bula nge. Yandi me zaba ve yinki Yawu vwandaka. Mpasi ya kisubidi me bika nge, yina me vwanda kuna, kaka na manima ya mama yina me beluka. Kana nge lunga kwikila na ntima ya nge ya muvimba kuna, mama. Nge ke kwikila yawu? Mbote mingi, telemisa diboko ya nge kana nge zola ndima yawu. Nzambi ke belusa nge.

Yinki diambu ya muntu yayi awa, muntu yayi na kati awa?

317 Kuna na nsuka na kati ya yinzo, beno vwanda na luzitu ya kieleka ntangu yayi. Beno katuka ve. Beno me mona, bimbevo yayi lunga kwenda na muntu mosi mpe yankaka.

318 Yinki ke diambu ya nge, tata? Bakala yayi ya mbuta me vwanda na kiti yayi? Nge ke kwikila? Nge ke kwikila ti Nzambi lunga belusa nge? Nge ke na arthrite, na bronchite. Nge ke kwikila ti Nzambi ke belusa yawu? Nge ke kwikila? Mbote mingi, nge lunga kuzwa yina nge me lomba. “Kana nge me kwikila!”

319 Yinki nge ke banza, mama, yina me vwanda na ntwala ya yandi? Nge ke kwikila, mpe? Nge ke kwikila? Nge ke kwikila ti Nzambi lunga tuba na munu mpasi ya nge? Nge ke ntama mingi na munu. Kwikila na Yandi kaka na ntangu yayi. Nge ke kwikila ti mu me tuba na nge Kieleka? Na yawu hypertension ya nge ke kulumuka. Nge ke kwikila yawu?

<sup>320</sup> Nge telemisaka diboko ya nge, mpe. Nge vwandaka meka na kupesa yandi kikesa. Nge ke kwikila ti Nzambi lunga tuba na munu yina ke . . . Nge me sala mbote mingi na kusadisa yandi, ntangu yayi Nzambi ke vwanda mbote mingi samu na kusadisa nge. Nge ke na mpasi ya kimpeve yina ke yangisa nge. Kana ya kieleka, ningisa diboko mutindu *yayi*. Yawu me mana ntangu yayi. Yandi ke sungika yawu.

<sup>321</sup> Yikwa ke kwikila? Yikwa na kati ya beno ke ndi- . . . yina ke Baklisto ve, kele na nsatu ti Yesu Klisto kele awa, yina lenda telema ntangu yayi, mpe kutuba, “Yesu, mu ke kukitalisa munu mosi mutindu nsumuki, ti Nge ke pesa munu lemvo ya masumu ya munu?” Beno telema. Nzambi sakumuna nge, tata. Nzambi sakumuna nge. Nzambi sakumuna nge. Nzambi sakumuna nge. Nzambi sakumuna nge. Nzambi sakumuna nge. Nzambi sakumuna nge. Yina ke . . . Nzambi sakumuna nge, nge, nge, nge. Yayi, Yandi ke mona nge. Yandi ke sonika nkumbu ya beno na ntangu beno ke sala mutindu yina.

<sup>322</sup> Na lweka yayi ya balcon, beno telema, mpe tuba, “Mfumu Yesu, mu zola ti, mu zola kukifwanikisa. Mu ke zola mawa samu na moyo ya munu.” Nzambi sakumuna nge, tata. “Mu zola mawa, Mfumu Yesu.”

<sup>323</sup> Nge lunga mona ve, nkundi ya munu, ti Yandi kele awa? Nzambi sakumuna nge, ntwenia ya bakala. Nzambi sakumuna nge. Nzambi sakumuna nge, ntwenia ya mama. Ya ke kima ya nene mingi yina nge me salaka ntete ve. Ntangu yayi muntu yankaka yina me salaka yawu ntete ve, telema, mpe tuba, “Mu ke zola kukifwanikisa, Mfumu Yesu. Mu ke kukifwanikisa munu mosi, na nkokila yayi.”

<sup>324</sup> “Yina ke ndima disumu ya yandi, ke kuzwa mawa. Yina ke bumba disumu ya yandi, ke kwenda na ntwala ve.”

<sup>325</sup> Beno zola sala yawu, na Ntwala ya Yandi? Nzambi sakumuna nge, mama. Mu zola . . . Nzambi sakumuna nge. Yinga. Mpe Nzambi sakumuna nge. Nzambi sakumuna nge, tata. Nzambi sakumuna nge, mama. Mfumu sakumuna nge.

<sup>326</sup> Beno ke tuba, “Yina zola tuba kima mosi ve?” Kati-kati ya lufwa na luzingu, yawu yina ke sala luswaswanu.

<sup>327</sup> Beno ke ndima ti beno ke na Ntwala ya Yandi awa? Beno ke ndima yawu? Beno ke wa nsatu yina? Beno tala, beno me mona Yawu, beno me mona Yawu ke sala. Yandi yina. Ya kieleka yawu yina Yandi tubaka ti Yandi ke sala. Beno ke kwikila yawu? [Dibuundu me tuba, “Amen.”—Mu.]

<sup>328</sup> Muntu yankaka kutuba, “Mu ke zola kukifwakisa munu mosi mutindu nsumuki, Mfumu. Nge ke pesa munu lemvo ya masumu ya munu na ntangu yayi.” Kana beno ke ya kutelema, beno telemisa kaka diboko ya beno. Bayankaka na kati ya beno na lweka ya kikaku, telemisa . . . Nzambi sakumuna nge. Nzambi sakumuna nge. Muntu yankaka kutuba, kuna na manima na

balcon, tuba, “Mu ke zola kukifwanikisa munu mosi, Mfumu Yesu. Mu ke lomba mawa, na nkokila yayi, na Ntwala ya Nge ya Kinzambi, mpe ke kwikila ti, beto ke na Ntwala ya nge awa na ntangu yayi, Nzambi yina ke Sambisa munu. Yandi zaba ti Yandi ke tuba na ntima ya munu mpe ke tuba na munu ti mu ke na kifu. Mu zola telema mpe mu tuba ti mu ke na kifu. Mu ke ndima kifu ya munu. Nge ke bedisa munu, na kati ya ntima ya munu.” Kikuma yawu yina mu me sukisa ndonga ya bisambu. Nzambi sakumuna nge. Nzambi sakumuna nge.

<sup>329</sup> Beno ke banza samu na yinki mu me sukisa yawu? Mu me sukisa yawu samu mu zabaka ti yina ke salama.

<sup>330</sup> Ntangu yayi, kele na bayankaka awa, beno zola telema ve? Beno telema mpe tuba ti Kima mosi ke tuba na ntima ya munu ti, “Nge ke na kifu.” Nzambi sakumuna nge, tata. Nzambi sakumuna nge. Nzambi sakumuna nge. Nzambi sakumuna nge. “Mu ke na kifu. Pesa munu lemvo, Mfumu. Mu ke kukifwanikisa munu mosi. Mu me telema, Mfumu, na Ntwala ya Nge. Mu zaba ti Nge kele awa. Mu . . . Ya kieleka Nge kele awa. Nge tubaka ti Nge ke sala kima yayi. Ntangu yayi mu ke . . . Mu ke mona kidimbu, mpe mu zaba ti yawu me tendusama na munu ti yina ke vwanda kidimbu ya bubu yayi. Mu ke wa Ndinga yina me bokila munu na kubalula ntima. Munu yayi, Mfumu. Mu ke kwikila na kidimbu. Mu ke wa Ndinga.”

<sup>331</sup> Ndinga ke tuba na beno na ntangu yayi! Vutuka, O nge yina me zimbana! Vutuka, O mbwetete yina ke yenga-yenga! Vutuka, O nge yina me zimbana! Vutuka, na nkokila yayi!

<sup>332</sup> Beno zola vutuka ve? Telema kaka mpe tuba, “Mu ke kukifwanikisa munu mosi mutindu nsumuki, yina ke lomba mawa ya yandi.” Muntu yankaka, nge zola sala yawu? Nzambi sakumuna nge, mama. Mwana, Nzambi sakumuna nge, kuna na zulu. Kana nge luta na lweka na yawu, Yandi ke sala kima mosi ve. Nzambi sakumuna nge, mama. Yina ke mbote mingi. Yina ke mbote mingi. Muntu yankaka? Vwanda kaka . . . Mu ke vingila diaka muniti mosi, samu mu ke wa mwa kizitu mosi awa, beno me mona. Muntu yankaka? Nzambi sakumuna nge, mama. Yina ke mutindu ya kusala yawu. Yawu yina. Muntu yankaka, “Mu zola kukifwanikisa munu mosi, mu me telema mpe mu ke talisa ti mu ke na kifu. Mu ke lomba mawa?” Beno ke sala yawu? Na nswalu nionso na ntwala beto kwenda na ntwala, telema mpe tuba, “Mu zola kukifwanikisa munu mosi, Mfumu Yesu.” Nzambi sakumuna nge, mama ya ntwenia.

<sup>333</sup> Beno zaba, mbala yankaka na ntwala beto vutuka na yinzo, na ntangu yayi to na nsukinina ke vwanda na lubungi ya madidi ke kwisa na ilungi ya beno. Mbala yankaka na suka mosi munganga ke kwisa mpe yandi ke meka kubula ya ntima ya beno, mpe yandi lunga sala diaka kima mosi ve. Na yawu beno ke wa

kitembo ya madidi ya lufwa ke kwisa na ilungi ya beno. Beno ke bambuka yina beno salaka.

<sup>334</sup> Beno bambuka, bawu lunga zika beno na mudindu ya mingi ve, bawu lunga sala kima mosi ve samu na beno. Nzambi silaka ti, “Mu ke vumbula beno diaka na lufwa, na kilumbu ya nsuka.” Beno tala. “Yandi yina ke wa Bandinga ya Munu mpe ke kwikila na Yandi yina tindaka Munu, yandi ke na Luzingu ya Kukonda nsuka mpe yandi ke kwisa ve na Lusambusu, kasi yandi me luta na lufwa tii na Luzingu.” Muntu mosi kuvwanza Yawu kana beno lenda sala yawu. Yesu Klisto tubaka Yawu. “Yandi yina ke kwikila (yina ke ‘bakula’) Ndinga ya Munu mpe ke kwikila na Yandi yina tindaka Munu, yandi ke na Luzingu ya Kukonda nsuka, mpe yandi ke kwisa ata fioti ve na Lusambusu, na kubedisama, kasi yandi me luta na lufwa tii na Luzingu.” Samu, yandi me kwikila na Mwana ya luzolo mosi kaka ya Nzambi, yina Nzambi vumbulaka na lufwa, bamvula mafunda zole me luta, mpe ke zinga awa, na nkokila yayi, ke talisa kisalu ya Yandi ya mvumbukulu ya Yandi.

<sup>335</sup> Muntu yankaka kuna lenda telema, na manima ya yina, yankaka kutuba, “Mu ke zola ndima Yawu. Mu ke zola ndima Yandi”? Nzambi sakumuna nge. Nzambi sakumuna nge. Yina ke mbote mingi, mama ya leke. Yina ke kima ya mbote. Mu zola ti beno bakula.

<sup>336</sup> Ntama mingi ve awa, mu vwandaka tala lubokilu mosi na autel, na ntangu bantu vwandaka kwisa, ke dia chewing gum, ke tindika bamosi na bayankaka na lweka.

<sup>337</sup> Kasi beno monaka makieleka na ilungi ya bantu? Bakento ya bawu ya bantwenia, na manima kubedisa bawu samu bawu zengisaka bansuki ya bawu, mpe samu na maquillage; mpe bawu telemaka, mpe na bansuki ya bawu ya kuzengisa, kaka mutindu yayi, “Mu ke nsumuki. Wa munu mawa, Nzambi.” Yina ke Bambuma me vwanda kuna. Nsemo me sema na zulu na yawu, mpe bawu me zaba yawu. Nzambi sakumuna nge.

Beto kulumusa bayintu ya beto na ntangu yayi.

<sup>338</sup> Mu zola ti konso mukwikidi awa, yina ke pene-pene ya muntu yina me telema, tetika diboko ya nge na zulu ya muntu yina, (beno ke sala yawu?), yina me telema. Bantu yayi ke pene-pene ya beno. Kana beno ke Muklisto, tetika diboko ya beno na zulu ya bawu, “Mpangi-kento, mpangi-bakala, mu ke tula diboko ya munu na zulu ya nge ntangu yayi. Mu ke sambila.”

<sup>339</sup> Tata ya Mazulu, na nkokila yayi awa kele na bayina—bayina ke kwikila na Nge. “Mwa bambuma kubwaka na lweka ya nzila,” Nge tubaka ti, “bandeke kwisaka mpe diaka yawu. Yankaka kubwaka na bisika ya matadi, mpe na kati ya bansende mpe bisika ya bansende. Kasi yankaka ke bwa na ntoto ya mbote, mpe yina ke butaka mbuma.” Mpe beto ke na Ntwala ya Nge awa, na nkokila yayi, me ndimisa bantu mingi awa na nkokila

yayi ti Nge ke Mwana ya Nzambi, ti Nge ke zinga mvu na mvu. Mpe Nge silaka ti, samu Nge ke zinga, beto mpe ke zinga.

<sup>340</sup> Mfumu Yesu, bawu me telema mpe me bikala ya kutelema na mutindu ya kimbangi mosi ti bawu ke kwikila na Nge. Ntangu yayi, Mfumu, mu zaba ti Nge ke baka kisika ya bawu na Kilumbu yina. Sala yawu, Mfumu. Mu ke pesa bawu na Nge, na Nkumbu ya Yesu Klisto. Bika ti bawu kwenda na mwa mabuundu ya mbote mpe ba botika bawu na mbotika ya Muklisto. Bika ti bawu vukana bawu mosi na mwa kimvuka ya bakwikidi. Bika ti bawu fuluka na Mpeve-Santu. Bika ti bawu vwanda bayimpu ya lunungu ya Nsangu ya mbote, mayaka ya Nge ya lunungu Kilumbu yina. Kana mu mona bawu diaka ve na ntuala Kilumbu yina ya nene, bika ti mu mona bawu na Kilumbu yina mutindu yawu vwandaka na vision yina, mpe ke tuba, “Nge ke zaba munu diaka ve? Yawu vwandaka na Baton Rouge, na nkokila yina, na ntangu mu telemaka.” Sala yawu, Tata. Bawu kele ya Nge, na Nkumbu ya Klisto.

<sup>341</sup> Na ntuala ya munu, awa, kele na bwati ya bamuswale, mwa basapatu ya fioti, mapapa ya bana, bamuswale, mpe bitenda ya bilele, mpe bitenda. Beto me longuka, na kati ya Biblia, ti bawu bakaka bamuswale mpe bitenda, yina simbaka nzutu ya Santu Paul, mpe bampeve ya yimbi vwandaka basika na bantu. Ntangu yayi, Tata, beto zaba ti beto ke Santu Paul ve, kasi Nge ke kaka Nzambi ya mutindu mosi, na yawu mu ke sambila ti Nge ke pesa mvutu ya mutindu mosi, na mutindu ti nsungi yayi ke kwikila ya kieleka. Bawu kwikilaka na Paul ve samu kaka yandi vwandaka Paul; kasi bawu kwikilaka na Paul samu Nge kukifwanikisaka Nge mosi na Paul. Ntangu yayi bawu ke kwikila mutindu mosi na nkokila yayi, Mfumu, ti Nge me kukifwanikisa na kati ya beto, na nkokila yayi. Mpe kilumbu mosi, beto ke tuba . . .

<sup>342</sup> Nsoniki mosi vwandaka tuba na beto, ti, “Na ntangu Israel vwandaka kwenda na ntoto ya nsilulu, mpe Nzadi Mbwaki kangaka bawu nzila, samu na kukangisa bawu nzila na kukuma na ntoto ya nsilulu.” Nsoniki tubaka, ti, “Nzambi talaka na nsi na nzila ya Dikunzi ya Tiya, na meso ya nkele, mpe Yawu vwandaka na zulu ya Israel. Yawu nataka kimpofu na mumpani, mpe mpimpa, kasi nsemo na Israel. Mpe na yawu Nzadi Mbwaki yina kangaka bawu nzila, yawu vwandaka na boma, mpe yawu vutukaka na manima, mpe Israel zabukaka na ntoto ya kuyuma tii na ntoto ya nsilulu.”

<sup>343</sup> Mfumu Nzambi, tala na nsi na nkokila yayi, na nzila ya Menga ya Yesu Klisto, Mwana na Nge. Mutindu mu ke tetika maboko ya munu na zulu ya bamuswale yayi, ti na ntangu bawu ke tula yawu na zulu ya bambevo, bika ti Mpeve-Santu, Mfumu, kutala na zulu ya muntu yina, mpe bika ti kimbevo kubasika, mpe bika ti bawu zabuka na ntoto yina ya mavimpi ya mbote mpe ya ngolo. Samu, Biblia ke tuba ti, “Na zulu ya bima nionso,” yina bawu vwandaka na yawu nsatu ti “beto vwanda na mavimpi



ya mbote.” Pesa yawu, Mfumu. Mu ke tinda yawu, na Nkumbu ya Yesu Klisto. Amen.

. . . ke kwenda,  
Kisika Yandi ke twadisa munu . . .

Beto yimbila.

. . . mu ke kwenda,  
Mu ke kwenda na Yandi,

Ntangu yayi na Ntwala ya Yandi awa, beto sambila Yandi na nzila ya mikunga, na mawete nionso.

. . . tii na nsuka.

<sup>344</sup> Beno lenda yimba yawu, kieleka, mutindu yayi:

Mu ke kwenda kisika Yandi ke twadisa munu,  
Mu ke kwenda kisika Yandi ke twadisa munu,  
Mu ke kwenda kisika Yandi ke twadisa munu,  
Mu ke kwenda . . .

Kana beno zola, beno telemisa maboko ya beno ntangu yayi.

. . . na Yandi tii na nsuka.

Beto telema ntangu yayi, mpe beto telemisa diaka maboko ya beto.

. . . Yandi na disamba,

<sup>345</sup> Muntu nionso kuyimbila na Mpeve ntangu yayi. Nsangu mosi ya makasi. Beto sambila Yandi na Ntwala ya Yandi. Ya ke zolaka ti ba sambila Yandi.

. . . na disamba,  
Mu ke kwenda na Yandi na disamba,  
Mu ke kwenda na Yandi, na Yandi tii . . .

Beto yimbila yawu ntangu yayi yinwa ya kukanga.

Mu lunga . . .

<sup>346</sup> Na yawu na ntangu beno ke yimbila yawu, mu zola ti beno pesa mbote na muntu mosi, mpe tuba, “Nzambi sakumuna nge, kizieti. Nzambi sakumuna nge, kizieti,” mutindu yina. Beto kele mosi. Methodiste, mpe Baptiste, Presbyterien, Pentecotiste, beno pesana mbote bamosi na bayankaka, “Nzambi sakumuna nge, kizieti.” Yawu yina beto kele: bizieti.

. . . disamba,

<sup>347</sup> Nzambi sakumuna nge, kizieti. Nzambi sakumuna beno, beto ke vwanda na bantu nionso. Nzambi sakumuna nge, mpangi ya munu ya bakala. Nzambi sakumuna nge. [Kisika ya mpamba na bande—Mu.]

. . . disamba,

Ntangu yayi beto kulumusa bayintu ya beto.

Mu ke kwenda na Yandi, oh, na Yandi tii na nsuka.

348 Na kukikulumusana nionso, beto kulumusa bayintu ya beto, samu na bisambu. Beno zimbana ve, lukolo ya Lumingu, na suka.

349 Samu na kikuma mosi to yankaka, mu ke wa ti mu ke na Ntwala ya Yandi na kati ya ntima ya munu. Ya ke mpasi samu na munu na kukatuka awa, na nkokila yayi, na mutindu nionso. Mu ke wa nsatu ti Mpeve-Santu me sepela, na nkokila yayi. Mbasi beto ke na lukutukanu mosi ya nene, samu na kumona bantu ke kwisa na Klisto, beno me mona. Muntu mosi yufulaka samu na yinki mu salaka ve lubokilu na autel. Mu ke vingila tii kuna mu ke twadisama na kusala yawu. Beno me mona?

350 Mu ke na kivuvu ti bantu nionso yina telemisaka maboko ya bawu, to telemaka, mu ke na kivuvu ti mbasi beno ke vwanda na yinzo-Nzambi mosi ya kitoko, samu na kubaka kisika ya beno na kati ya bakwikidi.

351 Na ntangu beto me kulumusa bayintu ya beto, mu ke lombana na pasteur na kukwisa na ntwala, kana yandi me zola, samu na kumanisa lukutakanu. Nzambi sakumuna nge ntangu yayi, kaka mutindu beto me kulumusa bayintu mpe bantima ya beto na ntwala ya Nzambi.



*NDINGA YA KIDIMBU* KNG64-0321E

(The Voice Of The Sign)

Nsangu yayi ya Mpangi William Marrion Branham, kulongamaka na Kingelesi, na nokila ya Kilumbu ya sambanu, na kilumbu ya 21 ya Ngonda ya Tatu, na mvula 1964, na Lukolo Denham Springs High School na Denham Springs, Louisiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2019 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)